



«ԿԱՆԱԶ ՔԱՂԱՔԻ ԳՈՐԾՈՂՈՒԹՅՈՒՆՆԵՐԻ ԾՐԱԳԻՐ ԳՅՈՒՄՐԻ ՔԱՂԱՔԻ
ՀԱՄԱՐ» ԾՐԱԳՐԻ ՈՒՍՈՒՄՆԱՍԻՐՈՒԹՅՈՒՆ
ԶԵԿՈՒՅՑ

Երևան 2023թ.

Բովանդակություն

1. Հապավումներ	3
2. Ներածություն.....	4
3. Գյումրի քաղաքի մասին.....	4
4. «Կանաչ քաղաք» ծրագրի մասին.....	5
5. Հայաստանի ներգրավվածությունը «Կանաչ քաղաք» գործողությունների ծրագրին.....	7
6. Գյումրու ԿՔԳԾ-ում արտահայտված բնապահպանական թեմաների, թիրախների և դրանց հասնելուն ուղղված միջոցառումների մասին.....	7
7. Գյումրիում իրականացվող ծրագրերը.....	21
8. Եզրակացություն.....	25
9. Աղբյուրներ.....	27
10. Հավելված 1.....	28
11. Հավելված 2.....	33
12. Հավելված 3.....	37

ՀԱՊԱՎՈՒՄՆԵՐ

ԱՀԿ - Առողջապահության համաշխարհային կազմակերպություն

ԱՄՆ- Ամերիկայի Միացյալ Նահանգներ

ԱՏՀ – աշխարհագրական տեղեկատվական համակարգ

ԲՄԱԳ - բնապահպանական և սոցիալական ազդեցության գնահատական

ԵՄ – Եվրոպական միություն

ԷԾՄԸ - Էներգետիկ ծառայություններ մատուցող ընկերություն

ԷԿՊ - Էներգախնայողության կատարողականի պայմանագիր

ԻԺՈՒՏ - իրական ժամանակում ուղևորներին տրամադրվող տեղեկատվություն

ԿՋ - կեղտաջուր

ԿՔԳԾ - Կանաչ քաղաք գործողությունների ծրագիր

ԿՔՇԾ - կայուն քաղաքային շարժունակության ծրագիր

ՀԷՑ – Հայկական էլեկտրական ցանցեր

ՀԿ - հասարակական կազմակերպություն

ՀՆԱ - համախառն ներքին արդյունք

ՀՆԳ - հեղուկացված նավթային գազ

ՀՆԳԾ - հոսակորստի նվազեցման գործողությունների ծրագիր

ՉՀՋ - չհաշվառված ջուր

ՊՄԳ - պետություն-մասնավոր գործընկերություն

ՊՈԱԿ - պետական ոչ առևտրային կազմակերպություն

ՄԲԳ - սեղմված բնական գազ

ՍԹԿ - սահմանային թույլատրելի կոնցենտրացիա

ՎԶԵԲ - Վերակառուցման և զարգացման եվրոպական բանկ

ՎԷՀ - վերականգնվող էներգիայի համակարգ

ՏՄ - տեղեկատվական մոդել

ՔԿԹ - քաղաքային կոշտ կենցաղային թափոն

ԹԿՊ5 - թթվածնի կենսաքիմիական պահանջարկ

CO₂ - ածխաթթու գազ

SO₂ - ծծմբային անհիդրիդ

ՆԵՐԱԾՈՒԹՅՈՒՆ

«ԷկոԼուր» տեղեկատվական ՀԿ-ն CEE Bankwatch Network միջազգային կազմակերպության աջակցությամբ իրականացրել է «Եղիր տեղեկացված Երևանում և Գյումրիում Կանաչ քաղաքների պլանների և ծրագրերի մասին» ծրագիրը, որի շրջանակներում ուսումնասիրել է «Կանաչ քաղաքի գործողությունների ծրագիր Գյումրի քաղաքի համար» ծրագիրը: Այն մշակվել է Վերակառուցման և զարգացման եվրոպական բանկի (ՎԶԵԲ) «Կանաչ քաղաք» ծրագրի շրջանակներում:

Զեկույցի պատրաստման համար ուսումնասիրվել են «Կանաչ քաղաքի գործողությունների ծրագիր Գյումրի քաղաքի համար» ծրագրի «ջուր», «կոշտ թափոններ», «արդյունաբերություն», «տրանսպորտ», «շինարարություն», «լուսավորություն և էներգամատակարարում, հողօգտագործում» ոլորտները: Այս ոլորտների համար առաջարկված միջոցառումները միտված են հասնելու Գյումրու ԿԲԳԾ-ում նշված բնապահպանական «Օդի որակ և ջերմոցային զագերի (ՋԳ) արտանետումների նվազեցում», «Ջրային ռեսուրս», «Հողեր», «Կանաչ տարածք, կենսաբազմազանություն, էկոհամակարգեր», «Դիմակայունություն և հարմարվողականություն տարերային աղետների ռիսկերին» թեմաների շրջանակներում սահմանված թիրախներին:

Ուսումնասիրվել է համացանցում առկա բաց տեղեկատվությունը, Գյումրու քաղաքապետարանի, ՀՀ կառավարության, ՀՀ շրջակա միջավայրի նախարարության, Վերակառուցման և զարգացման եվրոպական բանկի պաշտոնական կայքերը, զարգացման ծրագրերը: Իրականացվել է նամակագրություն Գյումրու քաղաքապետարանի և «Հայակական էլեկտրական ցանցեր» ՓԲԸ-ի հետ:

Եզրահանգումները հիմնված են ինչպես հասանելի աղբյուրների, փաստաթղթերի, առկա իրավիճակի ուսումնասիրությունների, այնպես էլ՝ Գյումրու համայնքապետարանի պատասխանների վրա:

ԳՅՈՒՄՐԻ ՔԱՂԱՔԻ ՄԱՍԻՆ

Գյումրին Հայաստանի՝ մեծությամբ երկրորդ քաղաքն է: Գտնվում է Հայաստանի հյուսիս-արևմուտքում՝ Ախուրյան գետի ձախ ափին, Շիրակի բարձրավանդակի կենտրոնական մասում, ծովի մակարդակից 1550 մետր բարձրություն ունեցող հարթավայրում: Քաղաքի վարչական տարածքը 4429,5 հա է, 2018թ. տվյալներով ունի 158 հազար 826 բնակիչ: Գյումրին Շիրակի մարզի բնակչության ֆինանսական կենտրոնն է, քանի որ քաղաքում գործում են Հայաստանի 12 բանկերի և 6 վարկային կազմակերպությունների մասնաճյուղերը:

Մեյամիկ ռիսկը մեծ է Գյումրիում՝ պայմանավորված քաղաքից 150 կմ-ի վրա գտնվող մի քանի ակտիվ խզվածքներով: Գյումրիում տեղի են ունեցել Ռիխտերի սանդղակով ավելի քան 8 մագնիտուդ ուժգնությամբ բազմաթիվ երկրաշարժեր, որոնցից ամենաավերիչները եղել են 1846թ., 1926թ. և 1988թ.:

Նախքան 1988թ. երկրաշարժը Գյումրիում գրանցված 41% ՀՆԱ-ի աճը երկրաշարժի

հետևանքով նվազել էր մինչև -11%: 20 տարի անց այն կազմել է մոտ 7%:¹ Երկրաշարժի հետևանքով վնասվել էին էլեկտրամատակարարման և ջրամատակարարման համակարգերն ու գազատարները: Հայաստանը կորցրել էր իր արտադրական ներուժի մոտ 40%-ը, քանի որ շատ արդյունաբերական գործարաններ ավերվել էին կամ վնասվել: Ներկայում լուրջ արդյունաբերական զարգացում Գյումրիում չկա: Մոտ 2150 գրանցված մասնավոր ձեռնարկությունների ավելի քան 80%-ն անհատ ձեռնարկատերեր են, իսկ միջին և մեծ ընկերությունները 1%-ից պակաս են: Վերջիններս արտադրական ձեռնարկություններ են, այդ թվում՝ սննդի, տեքստիլի, էլեկտրոնիկայի, մեքենայական սարքավորումների արտադրությամբ և մետաղի մշակմամբ զբաղվող, մինչդեռ մասնավոր ձեռնարկությունների մեծ մասը հիմնականում աշխատում է մանրածախ վաճառքի և ծառայությունների ոլորտում:

Գյումրին խոշոր տրանսպորտային հանգույց է, որը միջպետական մայրուղով և երկաթուղային կայարանով կապված է Հայաստանն ու Վրաստանը միմյանց կապող Երևան-Թբիլիսի-Բաթումի երկաթուղու և Շիրակի միջազգային օդանավակայանի հետ:

Գյումրու տնտեսության գլխավոր զարգացող ճյուղը զբոսաշրջությունն է: Գյումրին բնակավայր է եղել դեռ անհիշելի ժամանակներից: Տարածքում հայտնաբերվել են հնագիտական (մ.թ.ա. III հազարամյակից մինչև ուշ միջնադար) հուշարձաններ: Մինչև XIX դարի սկիզբը Գյումրին ընկել է մերթ Պարսկաստանի, մերթ Թուրքիայի տիրապետության տակ, ինչի պատճառով բազմիցս թալանվել է ու ավերվել: Գյումրու զարգացման ամենանշանակալի շրջանը դարձել է XIX դարը, երբ 1804 թ. ռուս-պարսկական առաջին պատերազմի ժամանակ այն հարակից տարածքներով հանդերձ մտել է Ռուսաստանի կազմի մեջ: Ներկայում այն Հայաստանի Հանրապետության մեծությամբ երկրորդ քաղաքն է:

Գյումրու տեղական ինքնակառավարումը հիմնվում է «Տեղական ինքնակառավարման մասին» ՀՀ օրենքով սահմանված սկզբունքների վրա: Գյումրու տեղական ինքնակառավարման մարմիններն են ավագանին և քաղաքապետը:

«ԿԱՆԱՉ ՔԱՂԱՔ» ԾՐԱԳՐԻ ՄԱՍԻՆ

ՎԶԵԲ-ի «Կանաչ քաղաք» ծրագիրը նախաձեռնվել է 2016 թվականին: Այն միտված է Բանկի գործունեության բոլոր երկրների քաղաքներում նպաստելու կանաչ տնտեսության անցմանը:

«Կանաչ քաղաքներ» ծրագրի նպատակն է.

1. Պահպանել բնապահպանական ակտիվների որակը (օդ, ջուր, հող և կենսաբազմազանություն) և օգտագործել այդ ռեսուրսները կայուն կերպով:
2. Մեղմացնել և հարմարվել կլիմայի փոփոխության ռիսկերին:

¹ «Կանաչ քաղաքի գործողությունների ծրագիր Գյումրի քաղաքի համար» ծրագիր

3. Ապահովել, որ բնապահպանական քաղաքականությունը և զարգացումները նպաստեն բնակիչների սոցիալական և տնտեսական բարեկեցությանը:²

Ծրագիրն ունի հետևյալ բաղադրիչները՝

1. **Կանաչ քաղաք գործողությունների՝ ծրագիր:** Այն գնահատում է բնապահպանական մարտահրավերները և առաջնահերթությունները, մշակում գործողությունների ծրագիր այդ մարտահրավերներին դիմակայելու համար:

2. **Կայուն ենթակառուցվածքային ներդրումներ:** Ներդրումները միտված են դյուրացնելու և խթանելու հանրային կամ մասնավոր կանաչ ներդրումները ջրի և կեղտաջրերի, քաղաքային տրանսպորտի, էներգիայի, շենքերի էներգաարդյունավետության, կոշտ թափոնների և այլ ոլորտներում, բարելավելու կլիմայի փոփոխության նկատմամբ քաղաքի հարմարվողականությունը և կլիմայական ցնցումներին դիմադրողականությունը:

3. **Կարողությունների զարգացում:** Այս բաղադրիչը միտված է քաղաքային ղեկավարությանը և տեղական շահագրգիռ կողմերին տեխնիկական աջակցություն տրամադրել՝ ապահովելու, որ ենթակառուցվածքային ներդրումները և «Կանաչ քաղաք» գործողությունների ծրագրում նշված քաղաքականության միջոցառումները արդյունավետ մշակվեն, իրականացվեն և վերահսկվեն:

Ծրագիրն իրականացնում են տարբեր մարմիններ, տարբեր ֆինանսական ինստիտուտներ:

Կանաչ քաղաքներ շրջանակային ծրագրի (GrCF, 48171) համար հաստատված ընդհանուր դրամագլուխը 2016թ. կազմել է **250 միլիոն եվրո**,³ հինգ տարի սպասվող տևողության համար: Նախատեսված էր Ծրագրի կենտրոնացում առաջին հերթին Կովկասում, Մոլդովայում և Բելառուսում, հետագայում՝ Արևմտյան Բալկաններում: Հատկացվող վարկերը նախատեսված են եղել կառավարությունների, քաղաքապետարանների, համայնքային սեփականություն հանդիսացող կոմունալ ընկերությունների և քաղաքային ծառայություններ մատուցող ընկերությունների համար:

Կանաչ քաղաքներ շրջանակային ծրագրի արագ իրականացման շնորհիվ 2018 թ. ներկայացվել է Կանաչ քաղաքներ շրջանակային ծրագիր 2 շրջանակը (GrCF2, 50440 և 50674) **700 միլիոն եվրոյի** նախատեսվող դրամագլխով հաջորդ հինգ տարիների համար: Այն նախատեսվել է քաղաքային ենթակառուցվածքներում ներդրումների՝ միաժամանակ կլիմայի փոփոխության և բնապահպանական մարտահրավերների հաղթահարման համար: GrCF2 դրամագլուխը 2020 թվականի հոկտեմբերին ավելացվել է՝ հասնելով **950 միլիոն եվրոյի**: 2021 թվականի նոյեմբերին GrCF2 պատուհան II-ի (53170) նորացումը հաստատվել է 2 միլիարդ եվրոյի դրամագլխով³:

Արդեն ՎԶԵԲ-ը հայտարարում է ընդհանուր 5 միլիարդ եվրոյի դրամագլխի, 50-ից ավելի քաղաքների «Կանաչ քաղաք» ծրագրին միանալու, քաղաքապետարանների

² <https://www.ebrdgreencities.com/green-cities/about/>

³ ՎԶԵԲ-ի 2022թ. մարտի «Կանաչ քաղաքներ» ծրագրի միջանկյալ գնահատում» փաստաթուղթ

կողմից 22 «Կանաչ քաղաք» գործողությունների ծրագրերի հաստատման, 83 նախագծերի իրականացման մասին:⁴

Հայաստանի ներգրավվածությունը «Կանաչ քաղաք» գործողությունների ծրագրին

«Կանաչ քաղաք» գործողությունների ծրագրի մաս են կազմում Երևան և Գյումրի քաղաքները:

«Կանաչ քաղաքի գործողությունների ծրագիր Գյումրի քաղաքի համար» ծրագրի մշակումը ֆինանսավորել է ՎԶԵԲ-ի շահառուների հատուկ հիմնադրամը (SSF): Այն մշակել է «Ատկինս», «Էյչ-Սի-Էլ Քոնսալթինգ» և Էլ-Դի-Քեյ (Atkins Acuity, HCL Consulting և LDK) ընկերությունների միջազգային փորձագիտական խումբը: Ծրագիրը հաստատվել է Գյումրի համայնքի ավագանու 2019թ. դեկտեմբերի 20-ի «Կանաչ քաղաք գործողությունների ծրագիր»-ը հաստատելու մասին» N 232-Ա որոշմամբ:

ԿՔԳԾ-ն ռազմավարական փաստաթուղթ է, որը ներկայացնում է Գյումրու՝ 2035 թվականի բնապահպանական տեսլականը: Փաստաթղթի նպատակն է բարելավել քաղաքի բնապահպանական կատարողականը ծախսարդյունավետ և ֆինանսապես կայուն եղանակով՝ միաժամանակ փորձելով առավելագույնի հասցնել լրացուցիչ տնտեսական և սոցիալական օգուտները:

Գյումրու ԿՔԳԾ-ի տեսլականն է. «Առողջացնել Գյումրի քաղաքի շրջակա միջավայրը և այն դարձնել առավել հարմար քաղաքացիների բնակության համար՝ օդի որակի, ջրային ռեսուրսների և հողօգտագործման բարելավման, էկոհամակարգերի պահպանման և կլիմայական փոփոխությունների հետևանքների մեղմման և հարմարողականության միջոցով: Պետք է նաև ստեղծել տնտեսական և տեխնոլոգիական աճի հնարավորություն, ինչի արդյունքում կստեղծվեն նոր աշխատատեղեր, և կբարելավվեն Գյումրու քաղաքացիների կյանքի պայմանները՝ ապահովելով «կանաչ» տնտեսության, կայունության և դիմակայության սկզբունքները: Վերջնականապես կնվազի քաղաքի շրջակա միջավայրը ապահով, մաքուր և կանաչ դարձնելը, ինչպես նաև նորարարության խթանումը՝ Գյումրու ողջ համայնքի բարեկեցությունն ու բարօրությունն ապահովելու համար»: ԿՔԳԾ-ի տեսլականն իրականացնելու համար ժամկետ է սահմանվել 2030-2035թթ.:

ԿՔԳԾ-ի շրջնակներում վերլուծվել և միջոցառումներ են նախատեսվել հետևյալ ոլորտների համար՝ «ջուր», «կոշտ թափոններ», «արդյունաբերություն», «տրանսպորտ», «շինարարություն, լուսավորություն և էներգամատակարարում», «հողօգտագործում»: Այս ոլորտների համար առաջարկված միջոցառումները միտված են հասնելու Գյումրու ԿՔԳԾ-ում նշված բնապահպանական «Օդի որակ և ջերմոցային գազերի (ՋԳ) արտանետումների նվազեցում», «Ջրային ռեսուրս», «Հողեր», «Կանաչ տարածք, կենսաբազմազանություն, էկոհամակարգեր», «Դիմակայունություն և հարմարվողականություն տարերային աղետների ռիսկերին» թեմաների շրջանակներում սահմանված թիրախներին:

⁴ <https://www.ebrdgreencities.com/>

**ԳՅՈՒՄՐՈՒ ԿՔԳԾ-ՈՒՄ ԱՐՏԱՀԱՅՏՎԱԾ ԲՆԱՊԱՀՊԱՆԱԿԱՆ ԹԵՄԱՆԵՐԻ,
ԹԻՐԱԽՆԵՐԻ և ԴՐԱՆՑ ՀԱՄԱԵԼՈՒՆ ՈՒՂՂՎԱԾ ՄԻՋՈՑԱՌՈՒՄՆԵՐԻ ՄԱՍԻՆ**

1. «Օդի որակ և ջերմոցային գազերի արտանետումներ»

Գյումրու մթնոլորտային օդի հիմնական մարտահրավերներն են՝ փոշով աղտոտվածության բարձր մակարդակը, ծծմբի երկօքսիդի օրական կոնցենտրացիայի հետևանքով առաջացող վտանգը, CO₂-ի՝ յուրաքանչյուր շնչին բաժին ընկնող բարձր մակարդակ և CO₂-ի արտանետումների քանակ ՀՆԱ-ի աճի յուրաքանչյուր միավորի համար:

Ըստ Գյումրու ԿՔԳԾ-ի՝ փոշու միջին տարեկան կոնցենտրացիան 325.6 մկգ/մ³ է, ծծմբի երկօքսիդի (SO₂) միջին օրական կոնցենտրացիան՝ 36.7 մկգ/մ³, CO₂-ի տարեկան արտանետումներ ՀՆԱ-ի միավորի հաշվով կազմել է ՀՆԱ-ի՝ 0.94 տ/մ. ԱՄՆ դոլար, իսկ CO₂-ի համարժեքի տարեկան արտանետումները մեկ շնչի հաշվով՝ 3.36 տոննա/տարի: Գյումրու օդի որակի վիճակի վրա ճնշում գործադրող (ներագրող) հիմնական ոլորտներն են «տրանսպորտը», «շինարարությունը, էներգասպառումն ու լուսավորությունը»:

✓ Մինչև 2025թ. միջնաժամկետ թիրախ.


1. Փոշու միջին տարեկան կոնցենտրացիա՝ 0.15 մկգ/մ³:
2. CO₂-ի տարեկան արտանետումները ՀՆԱ-ի միավորի հաշվով՝ 20%՝ համեմատած 2014 թ. մակարդակների հետ:
3. CO₂-ի՝ մեկ շնչին համարժեք արտանետումներ՝ 3.0 տոննա/տարի/մեկ շնչի հաշվով:
4. Էներգասպառումն արդյունաբերության ոլորտում՝ ըստ ՀՆԱ-ի մեջ արդյունաբերության ցուցանիշի միավորի՝ 5%՝ համեմատած 2015 թ. մակարդակների հետ:
5. Մասնավոր տրանսպորտային միջոցների օգտագործման տարածվածությունն ամենօրյա երթևեկության մեջ՝ 80%:
6. Անշարժիչ տրանսպորտային միջոցների օգտագործման տարածվածությունն ընդհանուր տեղաշարժի մեջ՝ 2%:
7. Էլեկտրականությամբ սնվող, հիբրիդային շարժիչներով, հեղուկացված նավթային գազով (ՀՆԳ) և սեղմված բնական գազով (ՄԲԳ) աշխատող հանրային տրանսպորտի ընդհանուր շարժակազմի մասնաբաժին՝ 60%:
8. Էլեկտրականությամբ աշխատող քաղաքային տրանսպորտային միջոցների մասնաբաժինը՝ 20%:
9. Էներգասպառումը շենքերում՝ 23 կՎտ/ժ:
10. Էներգասպառումը փողոցային լուսավորության համար՝ 25,000 կՎտժ/կմ:
11. Օդն աղտոտող աղբյուրների հայ
12. տնաբերված և մշտադիտարկվող մասնաբաժին՝ 30%:
13. Տվյալների տարեկան հավաքագրման ենթակա տրանսպորտային միջոցներ՝ 100%:

Այս թիրախներին հասնելու համար «տրանսպորտ», «շենքեր, էներգամատակարարում և լուսավորություն», «կոշտ թափոններ», «արդյունաբերություն», «հողօգտագործում» ոլորտներում նախատեսվել են միջոցառումներ:


Գյումրիում օդի աղտոտվածության ներկա վիճակ

ՀՀ շրջակա միջավայրի նախարարության «Հիդրոօդերևութաբանության և մոնիթորինգի կանտրոն» ՊՈԱԿ-ի տվյալների⁵ ուսումնասիրությունը ցույց է տալիս, որ 2022թ-ի բոլոր 4 եռամսյակներում արձանագրվել են փոշու ՍԹԿ-ի գերազանցումներ: Բացառությամբ 1-ին եռամսյակի, մյուս եռամսյակներում այդ գերազանցումներն ավելի բարձր են եղել 2021թ-ի համեմատ: Ազոտի երկօքսիդի և ծծմբի երկօքսիդի ՍԹԿ-ի գերազանցումներ 2021, 2022 թվականներին չեն արձանագրվել:

2022թ. 1-ին եռամսյակ




2022թ. 2-րդ եռամսյակ




2022թ. 3-րդ եռամսյակ

⁵ <http://armmonitoring.am/page/5>



2022թ. 4-րդ եռամսյակ



2. «Կանաչ տարածքներ, կենսաբազմազանություն և էկոհամակարգեր»

Գյումրու ԿՔԳԾ-ի համաձայն՝ կանաչ տարածքները պաշտոնական տվյալներով կազմում են մոտ 552 հա (2017), ինչը քաղաքի ընդհանուր մակերեսի 10%-ն է: Բաց կանաչ տարածքները նվազել են 1988 թվականի երկրաշարժի հետևանքով և 1990-ականների սկզբի էներգետիկ ճգնաժամի ընթացքում, երբ զգալի թվով ծառեր հատվում էին և օգտագործվում որպես վառելիք՝ տները ջեռուցելու համար: Բաց կանաչ տարածքների հարաբերակցությունը Գյումրու յուրաքանչյուր բնակչի հաշվով կազմել է 3.91 մ²/բնակիչ, մինչդեռ Առողջապահության համաշխարհային կազմակերպության (ԱՀԿ) կողմից առաջարկվող նվազագույն արժեքը 9 մ² է: Գյումրու՝ 2006 թվականին հաստատված հատակագծով նախատեսվում էր 17 մ² կանաչ տարածք յուրաքանչյուր բնակչի հաշվով, սակայն այս հարաբերակցությունը երբեք չի ապահովվել: Նման հավակնոտ թիրախի հասնելու համար կարևոր է կանաչ տարածքների վերականգնումը և նորացումը ներառել համապատասխան քաղաքաշինական նախագծերում: Բացի այդ, քաղաքի գլխավոր պողոտաներում աճող ծառերի խտությունը նույնպես անբավարար է: Պահպանման գոտում ներառված արվարձանների բուֆերային գոտիների ճամփեզրերին գտնվող ծառերը նույնպես հատվել են 1988 թվականից ի վեր: Ծառուղիների մեծ մասն ընդհատվում է կամ մնացել է մեկ շարքով, ինչը նվազեցնում է դրանց նշանակությունը:

2025թ. միջնաժամկետ թիրախ.

1. Մեկ բնակչի հաշվով կանաչ տարածքի ավելացում՝ մինչև 6 մ²:
2. Թռչունների տեսակների տարեկան աճ:
3. Քաղաքային ծառայությունների համապատասխան քաղաքականության և պլանավորման ոլորտում ժամանակակից պահանջներին համապատասխանող վերապատրաստում անցած աշխատակիցների ներգրավումը պլանավորման բաժին՝ 100%:
4. Հողօգտագործմանը և բնապահպանությանն առնչվող տվյալների մասնաբաժինը հավաքագրված և հասանելի է ԱՏՀ հարթակում՝ 50%:

Այս թիրախներին հասնելու համար նախատեսվում են մի շարք միջոցառումներ «հողօգտագործում» ոլորտում:

Գյումրիում կանաչ տարածքների ներկա վիճակ

2020թ-ին Գյումրի համայնքի հնգամյա զարգացման ծրագրի (2017-2021թթ.) իրականացման վերաբերյալ հաշվետվության համաձայն⁶, համայնքի կանաչ տարածքների համար նախատեսվել է 1.1% աճ, ինչը չի ապահովվել:⁷ 2021թ-ին նախատեսվել է 1.4%, սակայն իրականացվել է 1%-ի չափով⁸: 2022թ-ի համար նախատեսվել է կանաչ տարածքներն ավելացնել 1%-ով: 2022թ-ի զարգացման ծրագրի իրականացման հաշվետվությունը հրապարակված չէ:

Գյումրու քաղաքապետարանի հաշվետվություններում կանաչ տարածքների վերաբերյալ տվյալները համահունչ չեն Գյումրու ԿՔԳԾ-ին:

3. Հողեր

Ըստ Գյումրու ԿՔԳԾ-ի՝ հողի որակին առնչվող տվյալները սուղ են, չկա պարբերական մշտադիտարկում: Քաղաքի աղտոտված և աղտոտման ենթակա տարածքների հողերը գույքագրված չեն, և առկա չէ աղտոտված տարածքների գրանցամատյան: Որոշ գիտական ուսումնասիրություններ մատնանշում են աղտոտիչների մտահոգիչ մակարդակ: Օրինակ, հողում ծանր մետաղների առկայության վերլուծությունը Գյումրու 22 մանկապարտեզների հարակից տարածքներում ցույց է տվել, որ այնտեղ առկա է չափավոր և միջին մակարդակների աղտոտվածություն: Բարձր աղտոտվածություն ունեցող տարածքները գրանցված են քաղաքի որոշ բնակելի հատվածներում: Քաղաքացիների և ՀԿ-ների հարցումների արդյունքում հաստատվել է չլիազորված աղբավայրերի գոյություն:

✓ Մինչև 2025թ. միջնաժամկետ թիրախ

⁶https://www.gyumricity.am/data/legalacts/2021/%D5%B0%D5%B6%D5%A3%D5%A1%D5%B4%D5%B5%D5%A1%D5%A6%D5%A1%D6%80%D5%A3%D5%A1%D6%81%D5%B4%D5%A1%D5%B6%D5%AE%D6%80%D5%A1%D5%A3%D5%AB%D6%80_1.pdf

⁷ https://www.gyumricity.am/data/Hamaynqayin_Byuje/hngamya.PDF


⁸ https://www.gyumricity.am/data/Hamaynqayin_Byuje/27.1.pdf

1. ՔԿԹ-ի և այլ թափոնների (այդ թվում՝ վտանգավոր(ՎԹ) այն տոկոսը, որը հեռացվել և տեղափոխվել է ԵՄ չափանիշներին համապատասխանող սանիտարական աղբավայրեր՝ 95%,
2. Տեսակավորվող և վերամշակվող ՔԿԹ-ի հարաբերակցություն՝ 25%,
3. Վերամշակված արդյունաբերական թափոնների բաժնեմասը այդ թափոնների ընդհանուր ծավալում՝ 25%,
4. Թափոն արտադրողների այն տոկոսը, որոնք օգտվում են թափոնների հեռացման վճարովի, գործարքային ծառայությունից՝ 80%,
5. Աղտոտված և աղտոտման ենթակա տարածքների թվի նվազում 40%՝ համեմատած 2017թ. մակարդակների հետ:

Այս թիրախներին հասնելու համար նախատեսվում են մի շարք միջոցառումներ «Արդյունաբերություն», «Կոշտ թափոններ» ոլորտներում:

Գյումրու հողի և թափոնների ներկա վիճակ

ՀՀ շրջակա միջավայրի նախարարության կողմից Շիրակի մարզում, այդ թվում Գյումրիում կատարվում է հողում մետաղների՝ արսենի, քրոմի, պղնձի, նիկելի, վանադիումի, ցինկի մոնիթորինգ, համաձայն որի 2021թ. Շիրակի մարզի ուսումնասիրված հողերում՝ ՀՀ առողջապահության նախարարի 2010 թվականի հունվարի 25-ի N01-Ն հրամանով սահմանված ՍԹԿ-ները գերազանցում են՝ վանադիումի պարունակությունը՝ 1.1-2.5 անգամ, քրոմի պարունակությունը՝ 1.7-54.0 անգամ, նիկելի պարունակությունը՝ 6.0-37.8 անգամ, պղնձի պարունակությունը՝ 7.7-24.3 անգամ, ցինկի պարունակությունը՝ 2.2-8.3 անգամ, արսենի պարունակությունը՝ 4.0-21.0 անգամ և կապարի պարունակությունը՝ 1.7 անգամ:⁹



Նկար 1. Շիրակի մարզի հողերում վանադիումի պարունակությունն ըստ «Հիդրոտեքնոլոգիականության և մոնիթորինգի կենտրոն» ՊՈԱԿ-ի պաշտոնական կայքի

⁹ <http://armmonitoring.am/page/29>

Գյումրու համայնքապետարանի 2020-2021 թթ. զարգացման ծրագրերի իրականացման հաշվետվությունների համաձայն՝ համայնքում հավաքվել և աղբավայր է տեղափոխվել 95-96% աղբ, որքան որ պլանավորված է եղել նախապես: Նախատեսված 5%-ի փոխարեն միայն 2021 թ. մաքրվել է 2.2% տարածք: Նշվել է, որ բնակիչները բավարարված են աղբահանումից և սանիտարական մաքրումից:



Նկար 2. Աղբահանությունը Գյումրիում

Աղբի տեսակավորման, վերամշակման վերաբերյալ տվյալներ հաշվետվություններում չկան:

Գյումրին չունի ԵՄ չափորոշիչներին համապատասխան աղբավայր:

4. Ջրային ռեսուրսներ

Ջրային ռեսուրսին առնչվող Գյումրու առջև ծառացած կանաչ քաղաքի հիմնական մարտահրավերներն են.

- Կեղտաջրերի (ԿՋ) հավաքման անբավարար համակարգ և դրանց հեռացման անբավարար կարողություն, ինչն առաջացնում է հեղեղների, վատ ջրային միջավայրի և առողջական ռիսկեր
- Ջրամատակարարման համակարգում չհաշվառված ջրի (ՉՀՋ) չափազանց բարձր մակարդակ
- Մակերևութային ջրերի որակի ոչ արդյունավետ մշտադիտարկում
- Ջրի ոչ արդյունավետ օգտագործման վարքագծեր և տվյալների սահմանափակ հասանելիություն ու մշտադիտարկում

Ըստ Գյումրու ԿԲԳԾ-ի՝ թթվածնի կենսաքիմիական պահանջարկը (ԹԿՊ5), մասնավորապես, Ախուրյան գետում 3.44 մգ/լ է եղել, ամոնիումի (NH_4) կոնցենտրացիան՝ 1.78 մգ/լ, ինչը բացասական ներգործություն կարող է ունենալ ծածանազգի ձկների և սաղմոնազգիների պոպուլյացիաների առողջության և կենսական գործառույթների համար:

Սպառողներին բաշխվելու ընթացքում կորչող և չհաշվառվող ջրի ծավալի խոշոր բաժնեմասն ըստ չափումների եղել է 85-87%:

Գյումրու տարածքով հոսող երեք փոքր՝ Գյումրու, Ղոր-Ղոբիի և Չերքեզի ձորի գետերի մակերևութային ջրի որակը չի թեստավորվում կամ մշտադիտարկվում: Այս գետերից հոսող չմշակված ջուրը հոսում է դեպի Ախուրյան գետ և այնուհետև սահմանային գոտում գտնվող Ախուրյանի ջրամբար, որը ոռոգման համար հիմնական ջրամատակարարման աղբյուրն է:

Չնայած մակերևութային ջրերի կենսաբանական աղտոտիչների և անմիջական շփումից հնարավոր առողջական ռիսկերի ցուցանիշների (այսինքն՝ աղիքային կոլիֆորմի բակտերիաների) մասով մշտադիտարկում չի կատարվում, Գյումրու անասնապահության գործելակերպը, ինչպես նաև հիվանդանոցային արտահոսքերը ենթադրում են Ախուրյան գետի կենսաբանական աղտոտման բարձր ռիսկեր:

✓ Մինչև 2025թ. միջնաժամկետ թիրախ

1. Ամոնիումի (NH_4) կոնցենտրացիան գետերում և լճերում՝ 0.4-1.2 մգ/լ
2. Արդյունաբերական ջրի սպառումը որպես քաղաքային ջրի ընդհանուր սպառման տոկոս՝ 25%
3. Ջրամատակարարման ցանցի ծածկույթը և արդյունավետությունը բարելավվում են պլանների ու ներդրումների միջոցով՝ 75%
4. Անձրևաջրերի կամ կեղտաջրերի արտահոսքերի տարեկան քանակը՝ ցանցի երկարության 100 կմ-ի հաշվով՝ 50% նվազեցում՝ համեմատած 2017 թ. մակարդակների հետ
5. Կենցաղային և առևտրային ԿՁ-ի այն տոկոսը, որը մաքրվում է համաձայն կիրառվող ազգային չափանիշների՝ 60%
6. Չհաշվառված ջուր՝ 25-35%
7. Ջրի սպառումը քաղաքի ՀՆԱ-ի մեկ միավորի հաշվով՝ 0.4 մ³/տարի
8. Ջրի խնայողությունն ու կրկնակի օգտագործումը խրախուսվում են իրազեկման արշավների միջոցով՝ Հաղորդակցման մշակված ռազմավարություն և իրազեկման արշավ
9. Ջրային ռեսուրսները, այդ թվում՝ դրանց վիճակի և օգտագործման մասին տեղեկատվությունը, մինչև 2021թ. կներառվեն ԱՏՀ՝ 50%

Գյումրիում ջրի ներկա վիճակ

ՀՀ շրջակա միջավայրի նախարարության «Հիդրոոդերևութաբանության և մոնիթորինգի կենտրոն» ՊՈԱԿ-ի 2022թ. 4-րդ եռամսյակի տվյալների համաձայն Ախուրյան գետի ջրի որակը Ամասիա գյուղից ներքև, Գյումրի քաղաքից վերև և Բագարան գյուղից ներքև հատվածներում նոյեմբերին գնահատվել է «միջակ» (3-րդ դաս), Գյումրի քաղաքից ներքև՝ «վատ» (5-րդ դաս): 2021թ-ին Ախուրյան գետում հայտնաբերվել է Ֆոսֆատ իոն, արսեն, մանգան, ընդհանուր ֆոսֆոր, կախությային չոր նյութեր, ամոնիում իոն, նիտրիտ իոն, երկաթ, մոլիբդեն: Գետն ունեցել է 4-րդ դասի աղտոտվածություն ամոնիում իոնի, երկաթի, նիտրիտ իոնի, կախությային չոր նյութերի, բարձր աղտոտվածության պատճառով:

Քաղաքի 2020-2021թթ. զարգացման ծրագրերի հաշվետվություններում միջոցառումներ նշված չեն ջրային ռեսուրսների համար սահմանված թիրախներին հասնելու վերաբերյալ:

5. Կլիմայի փոփոխության նկատմամբ դիմակայունություն և հարմարվողականություն

Ըստ Գյումրու ԿՔԳԾ-ի՝ բնական աղետների առկա ռիսկն էական մարտահրավեր է հնարավոր տնտեսական կորստի տեսանկյունից: Համապետական ուսումնասիրությունների հիման վրա ռիսկի ենթակա ենթակառուցվածքները և տնային տնտեսությունները ճանաչվել են որպես հիմնական մարտահրավերներ: Գյումրու Աղետների ռիսկի նվազեցման 2018 թվականի պլանով սահմանվում է Գյումրու համար ռիսկ ներկայացնող աղետների, այդ թվում՝ ճանապարհների և արտաքին լուսավորության ոչ բարվոք վիճակի, սեյսմիկ ռիսկերի, ջրհեղեղների և անձրևաջրերի արտահոսքի, գրունտային ջրերի բարձրացման, ինչպես նաև բնակչության ցածր իրազեկվածության մակարդակի առաջնահերթությունը:

✓ մինչև 2025թ. միջնաժամկետ թիրախ.

- Աղտոտված այն տարածքների մասնաբաժինը, որը գույքագրվել է, քարտեզագրվել և գնահատվել - 50%
- Ռիսկի ենթակա հանրային ենթակառուցվածքի տոկոսը - 12%
- Ռիսկի ենթակա տնային տնտեսությունների տոկոսը - 12%
- Բնական աղետների՝ հեղեղների, երաշտի, երկրաշարժերի արդյունքում հասցված և գնահատված տնտեսական վնասը՝ որպես ՀՆԱ-ի բաժնեմաս - 1%
- Անցած 5 տարվա ընթացքում ծայրահեղ կլիմայական պայմաններում էլեկտրաէներգիայի երկարատև անջատումների ենթարկված բնակչության միջին մասնաբաժինը - 5%
- ԿՔԳԾ-ի գործողության ընթացքում աղետների ռիսկի նվազեցման և դիմակայունության ուժեղացման համար նախատեսված ֆինանսավորումը - բավարար է աղետների ռիսկի նվազեցման (ԱՌՆ) տեղական պլանների իրականացման համար

Այս թիրախներին հասնելու համար միջոցառումներ են նախատեսվել տրանսպորտ, շինարարություն, լուսավորություն և էներգամատակարարում, ջուր, հողօգտագործում ոլորտներում և միջոլորտային գործողություններում:

Ներկա վիճակ

Քաղաքում իրականացվել են ճանապարհաշինական և քաղաքային լուսավորության փոխարինման որոշակի միջոցառումներ:



Նկար 3. Վերանորոգված Հայուհու հրապարակ

Տրանսպորտ ոլորտ

Գյումրու տրանսպորտային ոլորտի համար քաղաքապետարանի և շահագրգիռ կողմերի հետ համատեղ մշակվել է 14 գործողություն՝ ԿԲԳԾ-ի գործընթացի միջոցով: 14 գործողություններից 8-ը ներառված են առաջնահերթ գործողությունների ցանկում, 6-ն ընդգրկված են որպես լրացուցիչ գործողություններ:

Ներկայացնում ենք առաջնահերթ գործողությունները, որոնց իրականացման ծրագրերի համար պատասխանատու է նշանակվել Գյումրու քաղաքապետարանի տրանսպորտի բաժինը:

1. Նոր հանրային տրանսպորտի ցանցի օպերատորի մոդել, ավտոբուսային հավաքակազմի արդիականացում և միասնական սակագնային ու տոմսային համակարգ: Իրականացման մեկնարկ և ավարտ՝ 2020 – 2024 թթ.:
2. Ավտոբուսային կանգառների ենթակառուցվածքի արդիականացում, այդ թվում՝ իրական ժամանակում ուղևորներին տրամադրվող տեղեկատվության (ԻԺՈՒՏ) համակարգի ներդրմամբ: Իրականացման մեկնարկ և ավարտ՝ 2020 – 2024թթ.:
3. Նոր հեծանվային ուղիների և հեծանվային կայանատեղու ենթակառուցվածք: Իրականացման մեկնարկ և ավարտ՝ 2020 – 2024թթ.:

4. Հետիոտնի համար նախատեսված ճանապարհային կողմնորոշիչ նշանների համաքաղաքային ցանց: Իրականացման մեկնարկ և ավարտ՝ 2021 – 2023թթ.:
5. Քայլելուն և հեծանվավազքին նվիրված գովազդային արշավներ: Իրականացման մեկնարկի և ավարտի ամսաթիվ՝ 2020 – 2021թթ.:
6. Կայուն քաղաքային շարժունակության ծրագիր (ԿՔՇԾ) Գյումրու համար: Իրականացման մեկնարկի և ավարտի ամսաթիվ՝ 2020 – 2021թթ.:
7. Տվյալների հավաքագրման համաքաղաքային ծրագիր և տրանսպորտային մոդել: Իրականացման մեկնարկ և ավարտ՝ 2020 – 2022թթ.:
8. Հանրային ավտոբուսների հանրակազմի արդիականացում՝ արտանետումների նվազեցված մակարդակով տրանսպորտային միջոցների համալրմամբ: Իրականացման մեկնարկ և ավարտ՝ 2021 – 2024թթ.:

Շենքեր, էներգամատակարարում և լուսավորություն ոլորտ

Գյումրու՝ շենքերի, էներգամատակարարման և լուսավորության ոլորտի համար մշակվել է 10 առաջնահերթ գործողություն, որոնց համար պատասխանատու է նշանակվել Գյումրու քաղաքապետարանի բնակկոմունալ և շրջակա միջավայրի պահպանության բաժինը:

1. Էներգաարդյունավետության մասին իրազեկում և տեղեկատվության տարածում բնակելի հատվածում: Իրականացման մեկնարկ և ավարտ՝ 2020 – մինչև այժմ:
2. Ցածր եկամուտ ունեցող սպառողների լուսատուները ԼԵԴ լամպերով փոխարինելու արշավ: Իրականացման մեկնարկ և ավարտ՝ 2020 – 2025թթ.:
3. Բնակելի շենքերի ջերմային արդիականացման պետություն-մասնավոր գործընկերության (ՊՄԳ) ծրագիր: Իրականացման մեկնարկ և ավարտ՝ 2020 – 2030թթ.:
4. Համայնքային էներգետիկ տեղեկատվական համակարգ և էներգակառավարում: Իրականացման մեկնարկ և ավարտ՝ 2022 – 2027թթ.:
5. Էներգախնայողության կատարողականի պայմանագրերի (ԷԿՊ) և էներգետիկ ծառայություններ մատուցող ընկերությունների (ԷԾՄԸ) հետ պայմանագրերի կնքում: Իրականացման մեկնարկ և ավարտ՝ 2020 – 2022թթ.:
6. Հանրային շենքերի ջերմային արդիականացման ծրագիր: Իրականացման մեկնարկ և ավարտ՝ 2022 – 2027թթ.:
7. Հանրային գնումներում էներգաարդյունավետ ապրանքների և ծառայությունների ձեռքբերման հայեցակարգային փաստաթղթի մշակում: Իրականացման մեկնարկ և ավարտ՝ 2020թ. – առ այսօր:
8. «Կանաչ» շենքերի խրախուսում: Իրականացման մեկնարկ և ավարտ՝ 2021թ. – առ այսօր:
9. Քաղաքի փողոցային լուսավորության էներգաարդյունավետ արդիականացում: Իրականացման մեկնարկ և ավարտ՝ 2020 – 2022թթ.:
10. Վերականգնվող էներգիայի միջին և խոշոր համակարգերի (ՎԷՀ) ներդրում Իրականացման մեկնարկ և ավարտ՝ 2020 – 2022թթ.:

Արդյունաբերություն ոլորտ

Գյումրու արդյունաբերական ոլորտի համար մշակվել է 5 գործողություն, որոնցից միայն մեկն է առաջնահերթ: Պատասխանատուն Գյումրու քաղաքապետարանի բնակկոմունալ և շրջակա միջավայրի պահպանության բաժինն է:

1. Աղտոտված արդյունաբերական տարածքների հետազոտում և ռիսկերի նվազեցում: Իրականացման մեկնարկ և ավարտ՝ 2020 – 2022թթ.:

Կոշտ թափոններ ոլորտ

Գյումրու կոշտ թափոնների ոլորտի համար մշակվել է 6 գործողություն, որոնցից 5-ը ներառված են գործողությունների առաջնահերթ ցանկում, իսկ 1 գործողություն ներկայացվում է որպես լրացուցիչ:

Ներկայացնում ենք առաջնահերթ գործողությունները, որոնց իրականացման ծրագրերի համար պատասխանատու է նշանակվել Գյումրու քաղաքապետարանի բնակկոմունալ և շրջակա միջավայրի պահպանության բաժինը:

1. Ապօրինի բաց աղբավայրերի վերացում և աղտոտված տարածքների վերականգնում, գործող աղբավայրի պատշաճ կառավարում: Իրականացման մեկնարկ և ավարտ՝ 2020 – 2024թթ.
2. Թափոնների հավաքման և դրանց գործող վճարային համակարգերի վերանայում ու վերամշակելի նյութերի հավաքման առանձին համակարգի գործարկում: Իրականացման մեկնարկ և ավարտ՝ 2020 – 2022թթ.:
3. Քաղաքային կոշտ թափոնների հեռացման և վերամշակման նոր ենթակառուցվածքի հիմնում: Իրականացման մեկնարկ և ավարտ՝ 2020 – 2027թթ.:
4. ՔԿԹ մորֆոլոգիայի ուսումնասիրություն և վերամշակման ենթակա նյութերի շուկայական հետազոտություն և թափոնների որակին առնչվող արձանագրությունների մշակում: Իրականացման մեկնարկ և ավարտ՝ 2020 – 2024թթ.:
5. Իրականացնել թափոնների կառավարման իրազեկման պարբերական արշավները: Իրականացման մեկնարկ և ավարտ՝ 2020 – 2024թթ.:

Ջուր ոլորտ

Գյումրու ջրային ոլորտի համար մշակվել է 12 գործողություն, որից 10-ը առաջնահերթ գործողություններ են, 2-ը՝ լրացուցիչ:

Ներկայացնում ենք առաջնահերթ գործողությունները, որոնց իրականացման ծրագրերի համար պատասխանատու է նշանակվել Գյումրու քաղաքապետարանի բնակկոմունալ և շրջակա միջավայրի պահպանության բաժինը:

1. Գյումրու ջրամատակարարման ցանցի ենթակառուցվածքի և ակտիվների համար գույքագրման և ԱՏՀ-ի նախապատրաստում: Իրականացման մեկնարկ և ավարտ՝ 2020 – 2022թթ.:
2. Ջրամատակարարման և ջրի պահանջարկի վերաբերյալ բարելավված տվյալներ և վերլուծություն: Իրականացման մեկնարկ և ավարտ՝ 2020 – 2023թթ.:
3. Հոսակորստի նվազեցման գործողությունների ծրագրի (ՀՆԳԾ) մշակում: Իրականացման սկիզբը և ավարտը՝ 2021 – 2022 թթ.:
4. ՀՆԳԾ-ն գործարկելու իրավական և ֆինանսական մեխանիզմները: Իրականացման սկիզբ և ավարտ՝ 2020 – 2022թթ.:
5. Մատակարարման համակարգի՝ արտահոսքի ամենաբարձր մակարդակ ունեցող մասերի նորոգում և վերականգնում: Իրականացման սկիզբը և ավարտը՝ Քայլ 1: 2020 – 2022: Քայլ 2: 2022 – 2025: Քայլ 3: 2022 – 2026թթ.:
6. Պատրաստել գույքագրում և ԱՏՀ կեղտաջրերի ենթակառուցվածքի համար: Իրականացման սկիզբ և ավարտ՝ 2020 – 2022թթ.:
7. Կեղտաջրերի վերաբերյալ գործողությունների ծրագրի և մրցութային փաստաթղթերի կազմում ենթակառուցվածքի առաջարկվող արդիականացման համար: Իրականացման սկիզբ և ավարտ՝ 2021 – 2022թթ.:
8. Դրենաժային համակարգերի վերականգնում և ընդլայնում: Իրականացման սկիզբ և ավարտ՝ 2021 – 2025թթ.:
9. Կեղտաջրերի մաքրման համակարգի վերականգնում և ընդլայնում: Իրականացման սկիզբ և ավարտ՝ 2021 – 2025թթ.:
10. Կանաչ տարածքներում հանրային օգտագործման ջրի ենթակառուցվածքի արդիականացում: Իրականացման սկիզբ և ավարտ՝ 2021 – 2025թթ.:

Հողօգտագործում ոլորտ

Գյումրու հողօգտագործման ոլորտի համար մշակվել է 7 առաջնահերթ գործողություն: Իրականացման համար պատասխանատու է նշանակվել Գյումրու քաղաքապետարանի բնակկոմունալ և շրջակա միջավայրի պահպանության բաժինը:

1. Գյումրի քաղաքի համար մշակել քաղաքային կայուն նախագծման ծրագիր, այդ թվում՝ նորացված գլխավոր հատակագիծ և գոտևորման կանոնակարգեր: Իրականացման սկիզբը և ավարտը՝ 2020 – 2021թթ.:
2. Գյումրու համար մշակել ԱՏՀ-ի վրա հիմնված հողօգտագործման տվյալների բազա և տեղեկատվական մոդել (СУ): Իրականացման սկիզբը և ավարտը՝ 2021 – 2023թթ.:
3. Ստեղծել քաղաքային նախագծման նպատակային ուղեցույց և գործիքներ: Իրականացման սկիզբը և ավարտը՝ 2022 – 2023թթ.:
4. Նախագծման քաղաքականության շինարարական կանոնակարգերի գործարկումը: Իրականացման սկիզբը և ավարտը՝ 2021 – 2030թթ.:
5. Քաղաքային պլանավորում, կայուն զարգացում, հանրային ոլորտի ներուժի զարգացում: Իրականացման սկիզբը և ավարտը՝ 2020 – շարունակական:
6. Հանրային զբոսայգիների, կանաչ տարածքների կառավարման ռազմավարություն: Իրականացման սկիզբը և ավարտը՝ 2020–2029թթ.:

7. Կանաչ ենթակառուցվածքի, զբոսայգիների և բաց տարածքների ապահովում:
Իրականացման սկիզբը և ավարտը՝ 2022-2025թթ.:

Միջոցառումային գործողություններ

Միջոցառումային գործողությունները չեն վերաբերում քաղաքային որևէ ոլորտի, բայց ուղղակիորեն կապված են բնապահպանական մարտահրավերների հետ: Մշակվել է 8 միջոցառումային գործողություն, որոնցից 4-ն առաջնահերթ գործողություններ են: Դրանց պատասխանատուն նշանակվել է Գյումրու քաղաքապետարանի բնակկոմունալ և շրջակա միջավայրի պահպանության բաժինը:

1. Իրականացնել ջրի, տրանսպորտի, կոշտ թափոնների, շինարարության, էներգիայի, լուսավորության ոլորտների ենթակառուցվածքների կլիմայի ռիսկի գնահատում: Իրականացման սկիզբը և ավարտը՝ 2020 – 2021թթ.:
2. Կլիմայի փոփոխության նկատմամբ Գյումրու ենթակառուցվածքի դիմակայության բարեկարգման գործողությունների ծրագրի նախապատրաստում: Իրականացման սկիզբը և ավարտ՝ 2021 – 2022թթ.:
3. Նախապատրաստել արտակարգ իրավիճակների պատրաստվածության գործողությունների ծրագիր: Իրականացման սկիզբը և ավարտը՝ 2023 – 2024թթ.:
4. Կլիմայի փոփոխության հարմարվողականության դիմակայության միջոցառումների համար ներդրում: Իրականացման սկիզբը և ավարտ՝ 2024թ. – շարունակական:

ԳՅՈՒՄՐԻՈՒՄ ԻՐԱԿԱՆԱՑՎՈՂ ԾՐԱԳՐԵՐԸ

«Կանաչ քաղաք» գործողությունների ծրագրի շրջանակներում ՎԶԵԲ-ը ֆինանսավորել է երեք վարկային ծրագիր: Դրանք են՝

1. 2016թ. - «Գյումրու քաղաքային ճանապարհներ» ծրագիր, որի համար ՎԶԵԲ-ը տրամադրել է 14,6 միլիոն եվրոյի սուվերեն վարկ Հայաստանին: Ծրագրի ընդհանուր արժեքը 21.9 միլիոն եվրո է:¹⁰
2. 2017թ. - «ՀԷՑ - Բաշիսիչ ցանցի արդիականացում», որի համար ՎԶԵԲ-ը տրամադրել է 80 միլիոն դոլար վարկ: Ծրագրի ընդհանուր արժեքը 200 միլիոն դոլար է:¹¹

¹⁰ <https://www.ebrd.com/work-with-us/projects/psd/gyumri-urban-roads.html>

¹¹ <https://www.ebrd.com/work-with-us/projects/psd/ena-modernisation-of-distribution-network.html>

3. 2021թ. - «Հայկական էլեկտրական ցանցեր»-ի ներդրումային ծրագիր» (GrCF2 W2 - ENA Investment Program), որի համար ՎԶԵԲ-ը տրամադրել է 60 միլիոն դոլար վարկ: Ծրագրի ընդհանուր արժեքը 148,400,000.00 ԱՄՆ դոլար է, ներառյալ մինչև 20,000,000 ԱՄՆ դոլար սինդիկացված:¹²

➤ **«Գյումրու քաղաքային ճանապարհներ» ծրագիր**

Ծրագրի համար ՎԶԵԲ-ը տրամադրել է 14,6 միլիոն եվրոյի սուվերեն վարկ Հայաստանին: Ծրագրի ընդհանուր արժեքը 21.9 միլիոն եվրո է: «Գյումրու քաղաքային ճանապարհներ» ծրագրի ԲՄԱԳ-ի համաձայն՝ նախատեսվել են Գյումրի քաղաքի Երևանի մայրուղի, Գարեգին Նժդեհի պողոտա, Վազգեն Սարգսյանի փողոց, Տիգրան Մեծի պողոտա, Սայաթ-Նովայի փողոց գլխավոր փողոցների, Ն.Ղորղանյան, Վարպետաց, Զիվանու, Կոմիտասի, Գերգենի երկրորդային փողոցների, Մուշ II ճանապարհի, Ազնավուրի և «Հայուհու» հրապարակների վերանորոգում և լուսավորության արդիականացում էներգախնայող լամպերով, ջրահեռացման համակարգերի վերականգնման աշխատանքներ, հետիոտնային մայրերի վերականգնման աշխատանքներ:

Գյումրու համայնքապետարանի պաշտոնական կայքում հրապարակված պայմանագրերի համաձայն՝ Կոմիտաս, Ն.Ղորղանյան, Զիվանու, Արուսյան փողոցների, Երևանի մայրուղու, Մուշ II ճանապարհի վերականգնման և լուսավորության արդիականացման աշխատանքների իրականացնելու համար Գյումրու համայնքապետարանը 2018թ. պայմանագիր է կնքել «Անդրմոսքով» ԲԲԸ-ի հետ, իսկ Գարեգին Նժդեհ, Տիգրան Մեծ մայրուղիների, Հայուհի հրապարակի վերանորոգման աշխատանքներն իրականացնելու համար պայմանագիր է կնքել «Մխիթան Ֆրատ» ՓԲԸ-ի և «Վահագն և Սամվել» ՓԲԸ-ի հետ, Վազգեն Սարգսյան, Գերգենի փողոցների և Շառլ Ազնավուր հրապարակի վերանորոգման աշխատանքների համար պայմանագիր է կնքել «Էյ.Էյ.Բի փրոջեկտ» և «Էլեկտրասերվիս» ՓԲԸ-ների հետ:

2021թ. դեկտեմբերի 9-ի 2017-Ն որոշմամբ¹³ Գյումրու քաղաքային ճանապարհներ» ծրագրի 2022 թվականին ստանձնած պարտավորությունների ամբողջ ծավալով կատարելու նպատակով Գյումրու ընտրված փողոցների՝ ներառյալ՝ հետիոտնային անցումների ցանցի և ջրահեռացման համակարգի վերակառուցման համար ՀՀ կառավարությունը տրամադրել է 948 միլիոն 312 հազար դրամ, իսկ 2022թ. նոյեմբերի 3-ի 1695-Ն որոշմամբ¹⁴՝ 325 միլիոն 129 հազար դրամ, որից 275 միլիոն 697 հազար դրամաշնորհ՝ ուղիղ վճարումներ կատարելու նպատակով և 49 միլիոն 433 հազար դրամը՝ որպես համաֆինանսավորում: Գյումրու քաղաքային ճանապարհները նախատեսված են եղել շենքերի և շինությունների կապիտալ վերանորոգման, ինչպես նաև մեքենաների և սարքավորումների ձեռքբերման համար:

¹² <https://www.ebrd.com/work-with-us/projects/psd/52868.html>

¹³ <https://e-gov.am/gov-decrees/item/37406/>

¹⁴ <https://e-gov.am/gov-decrees/item/39249/>

«ԷկոԼուր» տեղեկատվական ՀԿ-ն 2022թ. դեկտեմբերի 14-ին նամակով դիմել է Գյումրիի քաղաքապետարան, պարզելու համար, թե որքան գումար է հատկացվել ՎԶԵԲ-ի կողմից Գյումրի քաղաքի «Կանաչ քաղաք» գործողությունների ծրագրի մշակման համար: Գյումրու ԿՔԳԾ-ով նախատեսված կարճաժամկետ գործողություններից որո՞նք են իրականացվել, ի՞նչ ծավալով և ամեն գործողության համար որքա՞ն գումար է ծախսվել Ծրագրի մեկնարկից առ այսօր: (տե՛ս հավելված 1)

Ի պատասխան Գյումրու քաղաքապետ Վարդգես Սամսոնյանը 2022թ. դեկտեմբերի 20-ի N/01/20018-2022 գրությամբ ԷկոԼուրին հայտնել է. ««Գյումրու քաղաքային ճանապարհներ» ծրագրի շրջանակներում CW-ICB-2019/1 պիլոտային-2 բաղադրիչով քաղաքի թվով 33 փողոցներում 2021թ. տեղադրվել է արտաքին լուսավորության 1201 LED լուսատու ավտոմատ կառավարման համակարգով: Հայտարարված բաց մրցույթի արդյունքում հինգ մասնակիցներից հաղթող է ճանաչվել «ՊրոԴինամիկ» ՍՊԸ-ն և «Գուանդոնգ Մեյսոն Թեքնոլոջիս» լտդ. ՀՀ-ն: Պայմանագրի արժեքը կազմել է 332,523.6 եվրո»: ԿՔԳԾ-ի կատարման մասին այլ տվյալ Գյումրու քաղաքապետի նամակում նշված չէ:



Նկար 4. LED լուսատուներով արդիականացված փողոց Գյումրիում

2023թ. մարտի 20-ին «ԷկոԼուր» տեղեկատվական ՀԿ-ն ևս մի նամակ է ուղարկել Գյումրու համայնքապետարան՝ պարզելու, թե «Գյումրու քաղաքային ճանապարհներ» ծրագրի բնապահպանական և սոցիալական ազդեցության գնահատման փաստաթղթում նշված բոլոր փողոցները վերանորոգվե՞լ են, թե՞ կան փողոցներ, որոնց վերանորոգումն ու լուսավորության արդիականացման աշխատանքները շարունակվում են: ՀՀ կառավարության տրամադրած միջոցներով ի՞նչ շենք-շինություններ են վերանորոգվելու, ի՞նչ մեքենա-սարքավորումներ են ձեռք բերվելու և ի՞նչ նպատակով, ինչպես և հարց է տրվել, թե որքանով են կրճատվել ջերմոցային գազերի արտանետումները «Գյումրու քաղաքային ճանապարհներ» ծրագրի մեկնարկից ի վեր: (տե՛ս Հավելված 2)

Ի պատասխան՝ Գյումրու քաղաքապետարանից 2023թ. մարտի 24-ի 01//4058 նամակում նշված է. «Գյումրու քաղաքային ճանապարհներ» ծրագրի բնապահպանական և սոցիալական ազդեցության գնահատման հաշվետվությունում ներկայացված փողոցներում և հրապարակներում նախատեսված հիմնանորոգման աշխատանքներն ավարտվել են: Նշված փողոցների ու հրապարակների հիմնանորոգումն իրագործվել է Ծրագրի Ա Տրանշի շրջանակներում: Հիմնանորոգված բոլոր փողոցներում 2021թ. տեղադրվել են լուսադիոդային լուսատուներ, բացառությամբ Վարպետաց, Զիվանու, Աբովյան և Ղորղանյան փողոցների, որտեղ ճարտարապետական տեսքին համահունչ տեղադրվել են դեկորատիվ հենասյուներ և լուսատուներ: Նորոգվել են նշված փողոցների ջրահեռացման համակարգերը և կատարվել է ճանապարհային կահավորում:

- Հարցման մեջ նշված կառավարության որոշումների համաձայն տրամադրված միջոցներով իրականացվել են Գյումրու քաղաքի թվով 22 փողոցների և 1 հրապարակի հիմնանորոգման աշխատանքները՝ Ծրագրի Բ Տրանշի երեք չափաբաժինների շրջանակներում, ինչպես նաև արտաքին լուսավորության համակարգի արդիականացումը: Առաջին երկու չափաբաժիններով հիմնանորոգվել են Դաշտենց, Սունդուկյան, Աթարբեկյան, Մատնիշյան, Մազմանյան (Գորկու փողոցից մինչև Տերյան), Մազմանյան (Տերյան փողոցից մինչև առաջին գերազմանատուն), Թումանյան, Պուշկին, Մյասնիկյան, Մայակովսկի, Օզանյան, Տեր-Գաբրիելյան փողոցները, Կարսի խճուղին, Կարսի խճուղու առաջին նրբանցքը, Երևանյան խճուղու Այգաբաց 4-րդ շարքը, իսկ երրորդ չափաբաժնով՝ Կայարանամերձ հրապարակը, Արագած թաղամասի մեկ փողոց, Մուսայելյան, Ռուսթավելի, Շինարարների, Տիմիրզայեն փողոցները, Ե/Գ բանավան տանող Գարեգին Ա փողոցը մինչև մանկապարտեզ և Շարա Տայան փողոցի միջնամասը: Նշված բոլոր փողոցներում և հրապարակում արդիականացվել է փողոցային լուսավորության համակարգը: Նորոգվել կամ լիովին փոխարինվել են նշված փողոցների ջրահեռացման համակարգերը, կատարվել է ճանապարհային կահավորում:

- Ծրագրի շրջանակներում ջերմոցային գազերի արտանետումների ծավալների նվազեցման գնահատում նախատեսված չէ»:

➤ 2017թ. - «ՀԷՑ - Բաշխիչ ցանցի արդիականացում» ծրագիր

Այս ծրագրի իրականացման համար ՎԶԵԲ-ը տրամադրել է 80 միլիոն դոլար վարկ: Ծրագրի ընդհանուր արժեքը 200 միլիոն դոլար է:¹⁵ Ծրագիրն ուղղված է եղել Բաշխիչ ցանցի արդիականացմանը, այդ թվում՝ Հայաստանի ողջ տարածքում խելացի հաշվառման ներդրմանը: Ծրագիրը միտված է էներգաարդյունավետության բարելավմանը՝ նվազեցնելով տեխնիկական և առևտրային կորուստները, կրճատելու ածխածնի արտանետումները:

Ծրագիրը նախատեսել է.

¹⁵ <https://www.ebrd.com/work-with-us/projects/psd/ena-modernisation-of-distribution-network.html>

- գոյություն ունեցող ենթակայանների և գծերի վերակառուցում և արդիականացում և հնացած սարքավորումների փոխարինում
- էլեկտրաէներգիայի հաշվառման ավտոմատացված համակարգի ընդլայնում
- ցանցի ընդլայնում և նոր օգտվողների միացում
- նոր ավտոմատ կառավարման համակարգի տեղադրում և այլ օժանդակ ներդրումներ:¹⁶

➤ **2021թ. - «Հայկական էլեկտրական ցանցեր»-ի ներդրումային ծրագիր (GrCF2 W2 - ENA Investment Program)**

Այս ծրագրի համար ՎԶԵԲ-ը տրամադրել է 60 միլիոն դոլար վարկ: Ծրագրի ընդհանուր արժեքը 148,400,000.00 ԱՄՆ դոլար է, ներառյալ մինչև 20,000,000 ԱՄՆ դոլար սինդիկացված:¹⁷ Ծրագիրը 2017 թվականին կնքված՝ 80 միլիոն ԱՄՆ դոլար գումարի չափով ծրագրի երկարացումն է «Հայաստանի էլեկտրական ցանցերի» 10-ամյա (2016-2027) ներդրումային ծրագրի 1-ին փուլի իրականացման համար: Այն ՀԷՑ-ին հնարավորություն է ընձեռել իրականացնել ներդրումային ծրագրի 2-րդ փուլի 2021-2022թթ. -ի կապիտալ ներդրումները, որոնք, ի թիվս այլ ոլորտների, ուղղված կլինեն նաև Հայաստանի երկու խոշոր քաղաքներին՝ Երևանին և Գյումրիին: Ինչպես նշված է Ծրագրի նկարագրում, այն կօգնի ՀԷՑ-ին բարելավել էներգաարդյունավետությունը, նվազեցնել տեխնիկական և առևտրային կորուստները և, հետևաբար՝ ջերմոցային գազերի արտանետումները: Ծրագիրը նաև նպաստելու է համակարգի արդիականացման և նոր ավտոմատ կառավարման և խելացի հաշվառման համակարգերի կիրառմանը, ինչը օգնելու է բարձրացնել էներգահամակարգի հուսալիությունն ու ձկունությունը՝ մատակարարման ընդհատման միջին ժամանակի զգալի կրճատմամբ, քանի որ այդ ընդհատումները թե՛ խաթարիչ են, և թե՛ ծախսատար Գյումրիում և Երևանում բիզնեսների և այլ վերջնական օգտագործողների համար: Նախատեսվում է Հայաստանում զանգվածային ներդրել «խելացի» հաշվիչներ, որոնք թվային տնտեսության «խելացի» ցանցի կարևոր վերջնակետերն են: ՀԷՑ-ի ներդրումային ծրագիրն ուղղված է «Կանաչ քաղաքների գործողությունների պլաններում» սահմանված առաջնահերթություններին և մշակվել է՝ երկու քաղաքների քաղաքապետարանների հետ սերտորեն խորհրդակցելով և հաշվի առնելով «Կանաչ քաղաքների գործողությունների պլանները», որոնք ընկած են երկու քաղաքների նկատառումների հիմքում:¹⁸

«ԷկոԼուր» տեղեկատվական ՀԿ-ն 2023թ. հունվարի 10-ին նամակով դիմել է «Հայկական էլեկտրական ցանցեր» ՓԲԸ-ը՝ խնդրելով տրամադրել տեղեկատվություն վերոնշյալ երկու ծրագրերի կատարման մասին: (տես Հավելված 3)

Ի պատասխան ԷկոԼուրի հարցմանը՝ ՀԷՑ-ի գլխավոր տնօրեն Կարեն Հարությունյանը 2023թ. հունվարի 17-ին N08-ԿՀ-05/24 նամակով հայտնել է, որ Ընկերությունը 2016-2027թթ. համար պլանավորել և իրականացնում է լայնածավալ (347 միլիարդ դրամ)

¹⁶ <https://www.ebrd.com/work-with-us/projects/psd/ena-modernisation-of-distribution-network.html>

¹⁷ <https://www.ebrd.com/work-with-us/projects/psd/52868.html>

¹⁸ Կանաչ քաղաքների շրջանակ 2(GrCF2 W2) – «ՀԷՑ» Ներդրումային Ծրագիր

ներդրումային ծրագիր: Ծրագրի շրջանակում ի թիվս այլ նպատակների առկա են աշխատանքներ, որոնք միտված են էլեկտրական էներգիայի տեխնոլոգիական կորուստների կրճատմանը: Դրանցից առավել խոշորներն են՝

- Էլեկտրաէներգիայի ավտոմատ հաշվառման համակարգի ներդրման,
- 6(10) կՎ լարման ցանցերում տրանսֆորմատորների փոխարինման ծրագիրը:

Արդյունքում բաշխիչ ցանցում էլեկտրական էներգիայի տեխնոլոգիական կորուստների սահմանված 11,03% ցուցանիշը նվազել է՝ դառնալով 6,5% (2016-2022թթ.): Բաշխման ցանցում կորուստների կրճատումը կազմել է շուրջ 1,6 միլիարդ կՎտ/ժ, իսկ արդյունքում մթնոլորտ ջերմոցային գազերի արտանետման կրճատումը կազմել է շուրջ 684 հազար տոննա:

Կից աղյուսակում ներկայացնում ենք Ընկերության կողմից 2016-2027թթ. ընթացքում նշված ենթաուղղությունների մասին տեղեկատվությունը:

Տեղեկատվություն			
Էլեկտրական էներգիայի տեխնոլոգիական կորուստների կրճատմանը միտված, Ընկերության կողմից 2016-2027 թվականների ընթացքում իրականացված և իրականացվելիք ծրագրերի վերաբերյալ			
Ենթաուղղություններ		2016-2022	2023-2027
1	Էլեկտրաէներգիայի ավտոմատ հաշվառման համակարգի ներդրում	63 799 962	38 622 000
2	6(10) կՎ լարման ցանցերում տրանսֆորմատորների փոխարինում	5 548 306	222 000

ԵԶՐԱԿԱՑՈՒԹՅՈՒՆ

1. Գյումրիում շարունակում է բարձր մնալ մթնոլորտային օդի փոշով աղտոտվածությունը: 2021թ-ի համեմատ 2022թ. փոշով աղտոտվածության աստիճանը ավելի է բարձրացել:
2. Գյումրու քաղաքապետարանի հաշվետվություններում կանաչ տարածքների վերաբերյալ տվյալները համահունչ չեն Գյումրու ԿՔԳԾ-ին: Կանաչ տարածքների էական աճ չի արձանագրվել:
3. ՀՀ շրջակա միջավայրի նախարարության կողմից Շիրակի մարզում, այդ թվում Գյումրիում 2021թ. արձանագրվել են ծանր մետաղների ՍԹԿ-ների գերազանցումներ:
4. Գյումրու համայնքապետարանի 2020-2021թթ. զարգացման ծրագրերի իրականացման հաշվետվությունների համաձայն աղբահանությունը բարվոք վիճակում է (համայնքում հավաքվել և աղբավայր է տեղափոխվել 95-96% աղբ):
5. Աղբի տեսակավորման, վերամշակման վերաբերյալ տվյալներ հաշվետվություններում չկան:
6. Գյումրին չունի ԵՄ չափորոշիչներին համապատասխան աղբավայր:
7. ՀՀ շրջակա միջավայրի նախարարության «Հիդրոոդերևութաբանության և մոնիթորինգի կենտրոն» ՊՈԱԿ-ի 2021թ-ին Ախուրյան գետում հայտնաբերվել է Ֆոսֆատ իոն, արսեն, մանգան, ընդհանուր ֆոսֆոր, կախույթային չոր նյութեր,

- ամոնիում իոն, նիտրիտ իոն, երկաթ, մոլիբդեն գետն ունեցել է 4-րդ դասի աղտոտվածություն ամոնիում իոնի, երկաթի, նիտրիտ իոնի, կախությային չոր նյութերի, բարձր աղտոտվածության պատճառով: 2022թ. 4-րդ եռամսյակի տվյալների համաձայն Ախուրյան գետի ջրի որակը Ամասիա գյուղից ներքև, Գյումրի քաղաքից վերև և Բագարան գյուղից ներքև հատվածներում նոյեմբերին գնահատվել է «միջակ» (3-րդ դաս), Գյումրի քաղաքից ներքև՝ «վատ» (5-րդ դաս):
8. Քաղաքի 2020-2021թթ. զարգացման ծրագրերի հաշվետվություններում միջոցառումներ նշված չեն ջրային ռեսուրսների համար սահմանված թիրախներին հասնելու վերաբերյալ միջոցառումներ:
 9. Քաղաքում իրականացվել են ճանապարհաշինական և քաղաքային լուսավորության փոխարինման որոշակի միջոցառումներ:

ՎԶԵԲ-ի ֆինանսավորմամբ իրականացված «Գյումրու քաղաքային ճանապարհներ» ծրագրի մասին: Ծրագրի շրջանակներում վերանորոգվել են Գյումրու մի շարք փողոցներ, 33 փողոցներում տեղադրվել են էներգախնայող ԼԵԴ լամպեր: Համայնքը չի իրականացնում ջերմոցային գազերի արտանետումների նվազման գնահատում:

ՎԶԵԲ-ի ֆինանսավորմամբ իրականացվել են «ՀԷՑ - Բաշխիչ ցանցի արդիականացում», «Հայկական էլեկտրական ցանցեր»-ի ներդրումային ծրագիր» ծրագրերը: Սակայն ծրագրերով առանձնացված չեն դիտարկվել կոնկրետ Գյումրու համար նախատեսված միջոցառումները:

Գյումրու ԿՔԳԾ-ում ներկայացված տեղեկատվության մատուցման ձևաչափն անհարմար է օգտագործման համար:

ԱՂԲՅՈՒՐՆԵՐ

1. «Կանաչ քաղաքի գործողությունների ծրագիր Գյումրի քաղաքի համար» ծրագիր
2. 2020 թվականին Գյումրի համայնքի հնգամյա զարգացման ծրագրի (2017-2021 թթ.) իրականացման վերաբերյալ հաշվետվություն
3. 2021 թվականին Գյումրի համայնքի տարեկան աշխատանքային պլանի իրականացման վերաբերյալ հաշվետվություն
4. ՎԶԵԲ-ի 2022թ. մարտի «Կանաչ քաղաքներ» ծրագրի միջանկյալ գնահատում» փաստաթուղթ
5. Կանաչ քաղաքների շրջանակ 2(GrCF2 W2) – «ՀԷՑ» Ներդրումային Ծրագիր
6. ՀՀ կառավարության պաշտոնական կայք
7. ՀՀ շրջակա միջավայրի նախարարության «Շրջակա միջավայրի և մոնիթորինգի կենտրոն» ՊՈԱԿ-ի պաշտոնական կայք
8. Գյումրու քաղաքապետարանի պաշտոնական կայք
9. Վերակառուցման և զարգացման եվրոպական բանկի պաշտոնական կայք
10. Վերակառուցման և զարգացման եվրոպական բանկի կանաչ քաղաք ծրագրի կայք

“Ecolur” Informational NGO Address: 49/2 Hanrapetutyany, Yerevan, Armenia E-mail: ecolurpressclub@gmail.com Web site: www.ecolur.org Tel. (37491) 92 12 64 mob.		«ԷկոԼուր» տեղեկատվական ՀԿ Հասցե՝ Հանրապետության 49/2, Երևան, Հայաստան Էլ. հասցե՝ ecolurpressclub@gmail.com Էլ. կայք՝ www.ecolur.org Բջջ.՝ (+37491) 92 12 64
--	---	---

Գյումրի համայնքի ղեկավար
պարոն Վարդգես Սամսոնյանին

ՀԱՐՑՈՒՄ

Հարգելի պարոն Սամսոնյան,

«ԷկոԼուր» տեղեկատվական ՀԿ-ն իրականացնում է «Եղիր տեղեկացված Երևանում և Գյումրիում Կանաչ քաղաքների պլանների և ծրագրերի մասին» ծրագիրը: Ելնելով Ծրագրի նպատակներից, համաձայն «Տեղեկատվության ազատության մասին» ՀՀ օրենքի 6-րդ հոդվածի, խնդրում ենք տրամադրել տեղեկատվություն հետևյալի մասին.

1. Որքա՞ն գումար է հատկացվել ՎԶԵԲ-ի կողմից Գյումրի քաղաքի «Կանաչ քաղաք» գործողությունների ծրագրի մշակման համար:
2. Գյումրու ավագանու «ՀՀ Շիրակի մարզի Գյումրի համայնքի «Կանաչ քաղաք գործողությունների ծրագիր»-ը հաստատելու մասին» N 232-Ս որոշմամբ հաստատված Ծրագրով նախատեսված կարճաժամկետ գործողություններից որո՞նք են իրականացվել, ի՞նչ ծավալով և ամեն գործողության համար որքա՞ն գումար է ծախսվել Ծրագրի մեկնարկից առ այսօր: Ստորև ներկայացված են այդ միջոցառումները:

Ա. Տրանսպորտ՝ 8 գործողություն

- Նոր հանրային տրանսպորտի ցանցի օպերատորի մոդել, ավտոբուսային հավաքակազմի արդիականացում և միասնական սակագնային ու տոմսային համակարգ
- Ավտոբուսային կանգառների ենթակառուցվածքի արդիականացում, այդ թվում՝ իրական ժամանակում ուղևորներին տրամադրվող տեղեկատվության (ԻԺՈՒՏ) (RTPI) համակարգի ներդրմամբ
- Նոր հեծանվային ուղիների և հեծանվային կայանատեղի ենթակառուցվածք

- Հետիոտնի համար նախատեսված ճանապարհային կողմնորոշիչ նշանների համաքաղաքային ցանց
- Քայլելուն և հեծանվավազքին նվիրված գովազդային արշավներ
- Կայուն քաղաքային շարժունակության ծրագիր (ԿՔՇՕ) Գյումրու համար
- Տվյալների հավաքագրման համաքաղաքային ծրագիր և տրանսպորտային մոդել
- Հանրային ավտոբուսների հանրակազմի արդիականացում՝ արտանետումների նվազեցված մակարդակով տրանսպորտային միջոցների համալրմամբ

Բ. Շենքեր, էներգամատակարարում և լուսավորություն՝ 10 գործողություն

- Էներգաարդյունավետության մասին իրազեկում և տեղեկատվության տարածում բնակելի հատվածում
- Ցածր եկամուտ ունեցող սպառողների լուսատուները ԼԵԴ լամպերով փոխարինելու արշավ
- Բնակելի շենքերի ջերմային արդիականացման պետություն-մասնավոր գործընկերության (ՊՄԳ) ծրագիր
- Համայնքային էներգետիկ տեղեկատվական համակարգ և էներգակառավարում
- Էներգախնայողության կատարողականի պայմանագրերի (ԷԿՊ) և էներգետիկ ծառայություններ մատուցող ընկերությունների (ԷԾՄԸ) հետ պայմանագրերի կնքում
- Հանրային շենքերի ջերմային արդիականացման ծրագիր
- Հանրային գնումներում էներգաարդյունավետ ապրանքների և ծառայությունների ձեռքբերման հայեցակարգային փաստաթղթի մշակում
- «Կանաչ» շենքերի խրախուսում
- Քաղաքի փողոցային լուսավորության էներգաարդյունավետ արդիականացում
- Վերականգնվող էներգիայի միջին և խոշոր համակարգերի (ՎԷՀ) ներդրում

Գ. Արդյունաբերություն՝ 1 գործողություն

- Աղտոտված արդյունաբերական տարածքների հետազոտում և ռիսկերի նվազեցում

Դ. Կոշտ կենցաղային թափոններ՝ 6 գործողություն

- Ապօրինի բաց աղբավայրերի վերացում և աղտոտված տարածքների վերականգնում, գործող աղբավայրի պատշաճ կառավարում
- Թափոնների հավաքման և դրանց գործող վճարային համակարգերի վերանայում ու վերամշակելի նյութերի հավաքման առանձին համակարգի գործարկում
- Քաղաքային կոշտ թափոնների հեռացման և վերամշակման նոր ենթակառուցվածքի հիմնում
- ՔԿԹ մորֆոլոգիայի ուսումնասիրություն և վերամշակման ենթակա նյութերի շուկայական հետազոտություն և թափոնների որակին առնչվող արձանագրությունների մշակում

- Իրականացնել թափոնների կառավարման իրազեկման պարբերական արշավները (5R)

Ե. Ջրային ռեսուրսներ՝ 10 գործողություն

- Գյումրու ջրամատակարարման ցանցի ենթակառուցվածքի և ակտիվների համար գույքագրման և USՀ-ի (GIS) նախապատրաստում
- Ջրամատակարարման և ջրի պահանջարկի վերաբերյալ բարելավված տվյալներ և վերլուծություն
- Արտահոսքի նվազեցման գործողությունների ծրագրի (ԱՆԳԾ) մշակում
- ԱՆԳԾ-ի իրականացման համար իրավական և ֆինանսական մեխանիզմների մշակում
- Մատակարարման համակարգի՝ արտահոսքի ամենաբարձր մակարդակ ունեցող մասերի նորոգում և վերականգնում
- Պատրաստել գույքագրում և USՀ (GIS) կեղտաջրերի ենթակառուցվածքի համար
- Կեղտաջրերի վերաբերյալ գործողությունների ծրագրի և մրցութային փաստաթղթերի կազմում ենթակառուցվածքի առաջարկվող արդիականացման համար
- Ջրիեռ համակարգերի վերականգնում և ընդլայնում
- Կեղտաջրերի մաքրման համակարգի վերականգնում և ընդլայնում
- Կանաչ տարածքներում հանրային օգտագործման ջրի ենթակա-ռուցվածքի արդիականացում

Զ. Հողօգտագործում՝ 7 գործողություն

- Մշակել կայուն քաղաքային պլանավորման չափանիշներ Գյումրի քաղաքի համար և մշակել նորացված գլխավոր հատակագիծ և գոտևորման կանոնակարգեր
- Մշակել USՀ-ի վրա հիմնված հողօգտագործման տվյալների բազա և քաղաքի տեղեկատվական մոդել (PUS) Գյումրու համար
- Ստեղծել նպատակային քաղաքային պլանավորման ուղեցույց և գործիքներ
- Գործարկել քաղաքային պլանավորումը և շինարարական կանոնակարգերը
- Քաղաքային պլանավորում և կայուն զարգացում, հանրային հատվածի ներուժի ստեղծում
- Հանրային զբոսայգիների և կանաչ տարածքների կառավարման ռազմավարություն
- Կանաչ ենթակառուցվածքի, զբոսայգիների և բաց տարածքների ապահովում

Է. Միջոլորտային՝ 5 գործողություն

- Մշակել համայնքի օդի որակի վերահսկման համակարգ
- Իրականացնել կլիմայի ռիսկի գնահատում ջրի, տրանսպորտի, կոշտ թափոնների և շինարարության, էներգիայի և լուսավորության ոլորտների ենթակառուցվածքների համար

- Նախապատրաստել կլիմայի նկատմամբ Գյումրու ենթակառուցվածքի դիմակայության բարձրացման գործողությունների ծրագիր
- Մշակել արտակարգ իրավիճակներին պատրաստվածության գործողությունների ծրագիր
- Ներդրումներ կլիմայի փոփոխության հարմարվողականության և դիմակայության միջոցառումների համար:

3. Գյումրու քաղաքապետարանն ի՞նչ միջնաժամկետ և երկարաժամկետ միջոցառումներ է նախատեսում իրականացնել մինչև 2035թ-ը Գյումրի քաղաքի «Կանաչ քաղաք» գործողությունների ծրագրով սահմանված տեսլականին հասնելու համար:
4. Ի՞նչ դժվարություններ և խոչընդոտներ են ի հայտ եկել կարճաժամկետ գործողությունների իրականացման փուլում:
5. Իրականացված միջոցառումների արդյունքում 2019-2022թթ. ինչքա՞ն էլեկտրաէներգիայի խնայողություն է ապահովվել Գյումրի քաղաքում, և ինչքա՞ն է կրճատվել մթնոլորտային օդ արտանետվող ջերմոցային գազերը, որքա՞ն է նվազել մթնոլորտային օդի աղտոտվածության աստիճանը, Ծրագիրն ինչքա՞ն է նպաստել ջրային ռեսուրսների աղտոտվածության կրճատմանը, քանի՞ հեկտար կանաչ տարածք է հիմնվել, ե՞րբ է նախատեսվում գոյություն ունեցող ապօրինի աղբավայրերի վերջնական փակումը և նոր աղբավայրի շահագործման մեկնարկը, քանի՞ տոկոսով է նորացվել Գյումրի քաղաքի ավտոշարժակազմը:

Հարգանքով՝

Ինգա Զարաֆյան՝

«ԷկոԼուր» տեղեկատվական ՀԿ-ի նախագահ,

կենսաբանական գիտությունների թեկնածու



Ing

14.12.2022թ.



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՇԻՐԱԿԻ ՄԱՐԶ
ԳՅՈՒՄՐԻ ՀԱՄԱՅՆՔԻ ՂԵԿԱՎԱՐ

3104, Գյումրի, Վարդանանց իրավարար 1
Հեռ. (+374 312) 2-22-00 Ֆաքս (+374 312) 3-26-06
Էլ. փոստ gyumri@gyumri.am

N 01/30018-2022
«20» 12 2022թ.

«ԷԿՈԼՈՒՐ» ՏԵՂԵԿԱՏՎԱԿԱՆ ՀԿ
ՆԱԽԱԳԱՀ ԻՆԳԱ ԶԱՐԱՖՅԱՆՆ

Հարգելի տիկին Զարաֆյան

Ի պատասխան դեկտեմբերի 14-ի Ձեր հարցման հայտնում ենք, որ «Գյումրու քաղաքային ճանապարհներ» ծրագրի շրջանակներում, CW-ICB-2019/1 պիլոտային-2 քաղաքիչով քաղաքի թվով 33 փողոցներում 2021թ.-ին տեղադրվել է արտաքին լուսավորության 1201 LED լուսատու ավտոմատ կառավարման համակարգով: Հայտարարված բաց մրցույթի արդյունքում հինգ մասնակիցներից հաղթող է ճանաչվել «ՊրոԴինամիկ» ՍՊԸ և «Գուանդոնգ Մեյսոն Թեքնոլոջիս» լտդ. ՀԶ-ն: Պայմանագրի արժեքը կազմել է 332,523.6 եվրո:

ՀԱՐԳԱՆՔՈՎ՝

X  26.12.2022

Վ. ՄԱՄՈՆՅԱՆ

Կատ.' Ա. Վարդանյան
Հեռ.՝ 0312 2 22 27

“Ecolur” Informational NGO Address: 49/2 Hanrapetutyany, Yerevan, Armenia E-mail: ecolurpressclub@gmail.com Web site: www.ecolur.org Tel. (37491) 92 12 64 mob.		«ԷկոԼուր» տեղեկատվական ՀԳ Հասցե՝ Հանրապետության 49/2, Երևան, Հայաստան Էլ. հասցե՝ ecolurpressclub@gmail.com Էլ. կայք՝ www.ecolur.org Բջջ.՝ (+37491) 92 12 64
--	---	---

Գյումրի համայնքի ղեկավար
պարոն Վարդգես Սամսոնյանին

ՀԱՐՑՈՒՄ

Հարգելի պարոն Սամսոնյան,

Վերակառուցման և զարգացման բանկի ֆինանսական աջակցությամբ Գյուրիում իրականացվել է «Գյումրու քաղաքային ճանապարհներ» ծրագիրը: Ծրագրի ընդհանուր արժեքը, ըստ ՎԶԵԲ-ի կայքի, 21.9 միլիոն եվրո է, որից 14,6 միլիոն եվրոյի սուվերեն վարկ տրամադրել է ՎԶԵԲ-ը:

Ծրագրի Բնապահպանական և սոցիալական ազդեցության գնահատականի համաձայն՝ նախատեսվել են Գյումրու Երևանի մայրուղի, Գարեգին Նժդեհի պողոտա, Վազգեն Սարգսյանի փողոց, Տիգրան Մեծի պողոտա, Սայաթ-Նովայի փողոց գլխավոր փողոցների, Ն.Ղորանյան, Վարպետաց, Զիվանու, Կոմիտասի, Գերգենի երկրորդային փողոցների, Մուշ II ճանապարհի, Ազնավուրի և Հայուհու հրապարակների վերանորոգման և էներգախնայող լամպերով լուսավորության արդիականացման, ջրահեռացման համակարգերի վերականգնման աշխատանքներ, հետիոտնային մայրերի վերականգնման աշխատանքներ:

2021թ. դեկտեմբերի 9-ի 2017-Ն ՀՀ կառավարության որոշմամբ (<https://e-gov.am/gov-decrees/item/37406/>) «Գյումրու քաղաքային ճանապարհներ» ծրագրի 2022 թվականին ստանձնած պարտավորությունների ամբողջ ծավալով կատարելու նպատակով Գյումրու ընտրված փողոցների՝ ներառյալ հետիոտնային անցումների ցանցի և ջրահեռացման համակարգը վերակառուցման համար ՀՀ կառավարությունը տրամադրեց 948 միլիոն 312.8 հազար դրամ, իսկ 2022թ. նոյեմբերի 3-ի 1695-Ն որոշմամբ՝ (<https://e-gov.am/gov-decrees/item/39249/>) 325 միլիոն 129 հազար դրամ, որից 275 միլիոն 697 հազար դրամաշնորհ՝ ուղիղ վճարումներ կատարելու նպատակով և 49 միլիոն 433 հազար դրամը՝ որպես համաֆինանսավորում: Գումարները նախատեսված են շենքերի և շինությունների կապիտալ վերանորոգման, ինչպես նաև մեքենաների և սարքավորումների ձեռքբերման համար:

«Տեղեկատվության ազատության մասին» ՀՀ օրենքի 6-րդ հոդվածի համաձայն՝ խնդրում ենք տեղեկացնել.

- «Գյումրու քաղաքային ճանապարհներ» ծրագրի բնապահպանական և սոցիալական ազդեցության գնահատման փաստաթղթում նշված բոլոր փողոցները վերանորոգվել են, թե՛ կան փողոցներ, որոնց վերանորոգումն ու լուսավորության արդիականացման աշխատանքները շարունակվում են և ավելացել են նոր փողոցներ: Եթե դեռ կան վերանորոգվող փողոցներ, խնդրում ենք նշել դրանք:
- ՀՀ կառավարության տրամադրած միջոցներով ի՞նչ շենք-շինություններ են վերանորոգվելու, ի՞նչ մեքենա-սարքավորումներ են ձեռք բերվելու և ի՞նչ նպատակով:
- Որքանով են կրճատվել ջերմոցային գազերի արտանետումները «Գյումրու քաղաքային ճանապարհներ» ծրագրի մեկնարկից ի վեր:

Հարգանքով՝
Ինգա Զարաֆյան՝

«ԷկոԼուր» տեղեկատվական ՀԿ-ի նախագահ,
կենսաբանական գիտությունների թեկնածու



20.03.2023թ.



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՇԻՐԱԿԻ ՄԱՐԶ
ԳՅՈՒՄՐԻ ՀԱՄԱՅՆՔԻ ՂԵԿԱՎԱՐ

3104, Գյումրի, Վարդանանց հրապարակ 1
Հեռ. (+374 312) 2-22-00 ֆաքս (+374 312) 3-26-06
Էլ. փոստ gyumri@gyumri.am

N 011/4058
24.03.2023թ.

«ԷԿՈԼՈՒՐ» ՏԵՂԵԿԱՏՎԱԿԱՆ ՀԿ
ՆԱԽԱԳԱՀ ԻՆԳԱ ԶԱՐԱՖԱՆԻՆ

Հարգելի տիկին Զարաֆյան

Ի պատասխան 2023թ.-ի մարտի 20-ի Ձեր հարցմանը տեղեկացնում ենք.

- «Գյումրու քաղաքային ճանապարհներ» ծրագրի (Ծրագիր) Բնապահպանական և սոցիալական ազդեցության գնահատման հաշվետվությունում ներկայացված փողոցներում և հրապարակներում նախատեսված հիմնանորոգման աշխատանքներն ավարտվել են: Նշված փողոցների և հրապարակների հիմնանորոգումն իրագործվել է Ծրագրի Ա Տրանշի շրջանակներում: Հիմնանորոգված բոլոր փողոցներում 2021թ.-ին տեղադրվել են լուսադիոդային լուսատուներ, բացառությամբ Վարպետաց, Զիվանու, Աբովյան և Ղորղանյան փողոցների, որտեղ ճարտարապետական տեսքին համահունչ տեղադրվել են դեկորատիվ հենասյուներ և լուսատուներ: Նորոգվել են նշված փողոցների ջրահեռացման համակարգերը և կատարվել է ճանապարհային կահավորում:
- Հարցման մեջ նշված կառավարության որոշումների համաձայն տրամադրված միջոցներով իրականացվել են Գյումրի քաղաքի թվով 22 փողոցների և 1 հրապարակի հիմնանորոգման աշխատանքները՝ Ծրագրի Բ Տրանշի երեք չափաբաժինների շրջանակներում, ինչպես նաև արտաքին լուսավորության համակարգի արդիականացումը: Առաջին երկու չափաբաժիններով հիմնանորոգվել են Դաշտենց, Սունդուկյան, Աթաբեկյան, Մատնիշյան, Մազմանյան(Գորկու փողոցից մինչև Տերյան), Մազմանյան(Տերյան փողոցից մինչև առաջին գերեզմանատուն), Թումանյան, Պուշկին, Մյասնիկյան, Մայակովսկի, Օզանյան, Տեր-Գաբրիելյան փողոցները, Կարսի խճուղին, Կարսի

խճուղու առաջին նրբանցքը, Երևանյան խճուղու Այգաբաց 4-րդ շարքը, իսկ երրորդ՝ չափաբաժնով՝ Կայարանամերձ հրապարակը, Արագած թաղամասի մեկ փողոց, Մուսայելյան, Ռուսթավելի, Շինարարների, Տիմիրյազև փողոցները, Ե/Գ բանական տանող Գարեգին Ա փողոցը մինչև մանկապարտեզ և Շարա Տալյան փողոցի միջնամասը: Նշված բոլոր փողոցներում և հրապարակում արդիականացվել է փողոցային լուսավորության համակարգը: Նորոգվել կամ լիովին փոխարինվել են նշված փողոցների ջրահեռացման համակարգերը, կատարվել է ճանապարհային կահավորում:

- ☐ Ծրագրի շրջանակներում ջերմոցային գազերի արտանետումների ծավալների նվազեցման գնահատում նախատեսված չէ:

ՀԱՐԳԱՆՔՈՎ՝

24.11.2023
X 

Վ. ՎԱՆՅԱՆ

Կապ.՝ Ս. Զանոյան
Ա. Վարդանյան
0312 2 22 27

“Ecolur” Informational NGO Address: Hanrapetutyun 49/2 Yerevan, Armenia E-mail: ecolurpressclub@gmail.com Web site: www.ecolur.org Tel. (37491) 92 12 64 mob.		«ԷկոԼուր» տեղեկատվական ՀԿ Հասցե՝ Հանրապետության 49/2, Երևան, Հայաստան Էլ. հասցե՝ ecolurpressclub@gmail.com Էլ. կայք www.ecolur.org Բջջ. (+37491) 92 12 64
---	--	---

«Հայկական էկոլոգիական ցանցեր» ՓԲԸ-ի
գլխավոր տնօրեն պարոն Կարեն Հարությունյանին

ՀԱՐՑՈՒՄ

Հարգելի պարոն Հարությունյան,

«ԷկոԼուր» տեղեկատվական ՀԿ-ն իրականացնում է «Եղիբ տեղեկացված Երևանում և Գյումրիում Կանաչ քաղաքների պլանների և ծրագրերի մասին» ծրագիրը, որի նպատակն է լայն հասարակությանն իրազեկել Երևանում և Գյումրիում իրականացվող Կանաչ քաղաքների պլանների և ծրագրերի մասին:

«Հայկական էկոլոգիական ցանցեր» ՓԲԸ-ն իրականացնում է «Կանաչ քաղաքների շրջանակ 2(GrCF2 W2) – «ՀԷՑ» Ներդրումային Ծրագիր»-ը: Ըստ Ծրագրի նկարագրության այն իրենից ներկայացնում է 2017 թվականին կնքված 80 միլիոն ԱՄՆ դոլար գումարի չափով ծրագրի (OpID 48957) երկարացում՝ «Հայաստանի էկոլոգիական ցանցեր» ՓԲԸ-ի 10-ամյա (2016-2027թթ.) ներդրումային ծրագրի 1-ին փուլի իրականացման համար, որն ուղղված է Հայաստանում էկոլոգիական քաղաքների քաղաքական և կառավարական արդիականացմանը: Այն ՀԷՑ-ին հնարավորություն կընձեռի իրականացնել ներդրումային ծրագրի 2-րդ փուլի («Ծրագիր») 2021-2022թթ-ի կապիտալ ներդրումները, որոնք, ի թիվս այլ ոլորտների, ուղղված կլինեն նաև Հայաստանի երկու խոշոր քաղաքներին՝ Երևանին և Գյումրիին: Ծրագիրը Հայաստանում Վերակառուցման և զարգացման եվրոպական բանկի ներգրավվածության երկարացումն է՝ ՎԶԵԲ-ի «Կանաչ քաղաքներ» ծրագրի միջոցով: «ՀԷՑ»-ի ներդրումային ծրագիրն ուղղված է «Կանաչ քաղաքների գործողությունների պլաններում» (GCAP) սահմանված առաջնահերթություններին և մշակվել է՝ երկու քաղաքների քաղաքապետարանների հետ սերտորեն խորհրդակցելով և հաշվի առնելով «Կանաչ քաղաքների գործողությունների պլանները», որոնք ընկած են երկու քաղաքների նկատառումների հիմքում:

«Տեղեկատվության ազատության մասին» ՀՀ օրենքի 6-րդ հոդվածի համաձայն՝ խնդրում ենք տեղեկացնել.

- Այս Ծրագրի շրջանակներում ի՞նչ կապիտալ ներդրումներ է կատարել կամ կատարելու ՀԷՑ-ը:
- Ի՞նչ միջոցառումներ են նախատեսված «Կանաչ քաղաքների շրջանակ 2(GrCF2 W2) – «ՀԷՑ» Ներդրումային Ծրագրով», որոնք ուղղված են Երևանի և Գյումրիի «Կանաչ քաղաքների գործողությունների պլաններում» սահմանված առաջնահերթություններին, դրանցից որո՞նք են իրականացվել, որո՞նք՝ ոչ և ի՞նչ պատճառներով:
- Արդյո՞ք հաշվարկվել է, թե ինչքան էլեկտրաէներգիայի խնայողություն է ապահովվել Երևան և Գյումրի քաղաքներում իրականացված միջոցառումների արդյունքում և ինչքանով են կրճատվել մթնոլորտային օդ արտանետվող ջերմոցային գազերը:
- Որքա՞ն գումար է ծախսվել այդ միջոցառումների իրականացման համար:

10.01.2023թ.

Բնագա Զարաֆյան՝

«ԷկոԼուր» տեղեկատվական ՀԿ-ի նախագահ,

Կենսաբանական գիտությունների թեկնածու



Handwritten signature



ՀԱՅԱՍՏԱՆԻ ԷՆԵՐԳԵՏԻԿԱԿԱՆ ՑԱՆՁԵՐ

ԳԼԽԱԿՈՐ ՏՆՕՐԵՆ

ԳՅ, ք. Երևան, 0047, Ա. Արմենակյան 127, հեռ.՝ +374 (10) 65 00 86

№ 08-ՊԻ-05/24
«17» 01 2023
Ձեր _____

«ԷկոԼոյր» տեղեկատվական ՀԿ
նախագահ Ինգա Զարաֆյանին

Հարգելի Ինգա Զարաֆյան,

Ընկերությունը գոհունակությամբ է վերաբերվում Ձեր կողմից իրականացվող «Եղիր տեղեկացված Երևանում և Գյումրիում Կանաչ քաղաքների պլանների և ծրագրերի մասին» ծրագրին, որի նպատակն է լայն հասարակությանն իրազեկել Երևանում և Գյումրիում իրականացվող Կանաչ քաղաքների պլանների և ծրագրերի մասին:

Ընկերությունը 2016-2027 թվականների համար պլանավորել և իրականացնում է լայնածավալ (347 մլրդ դրամ) ներդրումային ծրագիր: Ծրագրի շրջանակում ի թիվս այլ նպատակների առկա են աշխատանքներ, որոնք միտված են էլեկտրական էներգիայի տեխնոլոգիական կորուստների կրճատմանը: Դրանցից առավել խոշորներն են՝

- ✓ էլեկտրաէներգիայի ավտոմատ հաշվառման համակարգի ներդրման,
- ✓ 6(10) կՎ լարման ցանցերում տրանսֆորմատորների փոխարինման ծրագիրը:

Նշված աշխատանքներն պլանավորելիս Ընկերությունը խնդիր չի ունեցել տարանջատել դրանք ըստ Երևանի կամ Գյումրու: Դրանք պլանավորվել են Ընկերության սպասարկման ողջ տարածքի համար՝ ըստ առավել խնդրահարույցների: Արդյունքում բաշխիչ ցանցում էլեկտրական էներգիայի տեխնոլոգիական կորուստների սահմանված 11.03% ցուցանիշը նվազել է դառնալով 6.5% (2016թ.-ից 2022թ.): Բաշխման ցանցում կորուստների կրճատումը կազմել է շուրջ 1.6 մլրդ կՎտ.ժ, իսկ արդյունքում մթնոլորտ ջերմային զազերի արտանետման կրճատումը կազմել է շուրջ 684 հազ տոնա:

Կից աղյուսակում ներկայացնում ենք Ընկերության կողմից 2016-2027թթ. ընթացքում նշված ենթաուղղությունների մասին տեղեկատվությունը:

Աղյիք՝ 1 (մեկ) էջ:



Կ. Հարությունյան

Կառ.՝ Ցու. Գավրիլենկո
Հեռ. 010 59 13 30

Տեղեկատվություն

Էլեկտրական էներգիայի տեխնոլոգիական կորուստների կրճատմանը միտված, Ընկերության կողմից 2016-2027 թվականների ընթացքում իրականացված և իրականացվելիք ծրագրերի վերաբերյալ

հազ. դրամ առանց ԱԱՀ

	Ենթաուղղություններ	2016-2022	2023-2027
1	Էլեկտրաէներգիայի ավտոմատ հաշվառման համակարգի ներդրում	63 799 962	38 622 000
2	6(10) կՎ լարման ցանցերում տրանսֆորմատորների փոխարինում	5 548 306	222 000